

摘藻堂四庫全書薈要

集部

欽定四庫全書薈要

集部

震川別集卷二上



欽定四庫全書薈要卷一萬七千一百十四

集部

震川別集卷二上

明 歸有光 撰

應制策

嘉靖庚子科鄉試對策五道

第一問

夫闡揚帝王之烈者必假於文以傳文者所以譌述往古傳示來裔著之不刊垂之無極者也蓋帝王為可繼

之道而未必其後世之能繼其所託以傳者典冊紀載而已典冊紀載而不文則不足以傳故曰言之無文行之不遠由此言之則帝王所以衍萬世無疆之休者其創立在我而其纂述而揚厲之者在于後人一代之文不具則一代之道德經制亦幾乎泯矣故古之帝王所恃以為不泯而使其子孫世世有考焉者託之于文也我國家列聖相承代有作述所以闡揚祖功宗德者亦既備矣如一統志會典之作皆在于前朝文盛之世以

昭混一之盛經綸之迹者執事以下詢末學愚生槩乎
未之知也至于考制度審憲章博聞而強識之又非所
及也夫金匱石室之藏蘭臺秘閣之載草野賤人無所
得覩記惟二書傳誦於天下已久愚生可以端拜而論
乎苟卿子曰欲觀聖王之迹於其燦然者矣所謂燦然
者豈非聖人之制作布之天下迪之後世者也虞夏商
周之盛可考已當時之所謂典章經制者皆聖人之作
而又有聖人者以播揚之故其言語文章著于天下大

者事天饗帝小者至于戲互蟲豸靡不纖悉王府則有以咸正無缺豈非其盛歟漢以後其德固已不逮于古而當時文章之盛猶彷彿于三代故太史公八書之撰班固諸志之述猶足以備一家之言至于唐之六典宋之會要元之經世大典則其文章氣勢愈趨於下而說者謂三代之後惟唐制為盡善而六典建官之法足以上追姬周則其亦未可輕訾者而此于典謨則有間矣蓋虞夏商周有帝王之制而又有帝王之文漢之文可

矣而制不備唐宋則文與制均之未至也若今一統志
會典之作欲以比隆于典謨而豈可與漢唐宋例論哉
然愚獨恨當時儒臣奉命不能深明聖意究述作之至
以勒一代之鉅典而容有采緝補綴疎畧牴牾于其間
蓋一統志出于睿皇帝之命而大學士李賢等為之者
也會典出于敬皇帝之命而大學士李東陽等為之者
也是二者若以為聖人之制則何敢議出于二臣之手
誠不能無疵者蓋祖宗之功烈過漢唐亦宜有比隆三

代之文不宜猥瑣于末議牽制于文詞而賢等所載沿革郡名人物古蹟往往剽摘書傳字句詩人組繪之語不足以稱王者之制而職司事例又多務簡省一代之因革漫不可考夫以祖宗之土宇自古所未有而祖宗之制述亦自古所未有而漫以若此則二臣之過也今天子中興邁志憲古已嘗勅所司重修會典則一統志亦將以次而及之矣開局秉筆固皆一代之長材茂學必有所見以廣聖意者愚猶以為彰往緒揚休烈以紹

諸無窮當屬諸一代之宗工而其體裁宜依仿禹貢周
官之書序山川必先其原委于田土物貢尤必著其詳
而民風土俗則畧用漢地里志及後世圖經之法序官
職必先其體統于建廢沿革悉皆存其故至于臣下論
建亦如歷代書志通攷之類兼存而並志之又竊謂修
書之臣高帝之時多延天下有文學者如梁寅徐一夔
之徒皆以儒士在局今拘于科目一不可也蘇洵修禮
書必欲明實錄以昭來世今動有避諱使人無從攷實

二不可也自古為書者多出一手今局務既開議論紛
沓分門著撰文體不一三不可也古之文章必先體制
今之文章馳騁浸淫極矣而不要于古雅體裁不明義
例不立四不可也明興以來百七十年豈無遷固之徒以
勒成一代之典哉愚生狂僭及此惟執事寬之

第二問

王者既以其身致天下之治尤必思所以繼其治而詒
以萬世之業故天下之本在于太子太子之教不可不

豫也三代尚矣其遺法至今猶存禹有典則而啟敬承
湯有風愆而太甲終允德文武有謨訓而成康代為有
周之令主誠以天下之大生民之衆天命之隆替祖宗
之繼隆咸有賴于一人故曰一人元良萬邦以貞太子
之謂也太子之教萬世之所係也恭惟皇天眷佑我皇
上篤生元子正東宮之號螽斯繁衍廣藩輔之封皇子
賴天能勝衣將出閣講讀宗社休嘉臣庶均慶遠稽古
典近考制度斟酌損益以適萬世之中以裨我皇上盛

德至意者不獨文學法從之臣有是心而亦江湖之士之所同也愚所望于今日者固三代之事而已漢唐宋其何足以云今者六傳之設賓客之制崇文崇賢府坊館局之建官則備矣而非古之三公三少之舊也帝範之書戒子之篇元良之述承華要畧之制教則詳矣而非古之典則之詒也古法之存于今者惟周制為詳其可考者在二戴之記及所稱明堂青史氏之記古者胎教王后腹之七日而就宴室太史持銅御戶左太宰持

升御戶右比及三月王后所求聲音非禮樂太師縵瑟而稱不習所求滋味非正味太宰倚升而言曰不敢以待王太子太子生有士負之禮有擇于諸母之禮有知妃色就學之禮有記過之史有徹膳之宰有誹謗之木
有敢諫之鼓工誦箴瞽誦詩百工執藝事以諫有三公三少保保其身體傳傳之德義師道之教訓故成王之生仁者養之孝者襁之四賢傍之而德成也後世官非三代之官而教非三代之教始以為之法者既無周密

詳悉之慮而其為言又無躬行心得為之本而官僚並
建辭旨諄復徒一時之美觀耳漢高祖文帝之盛所崇
用者叔孫生晁錯之徒卒使惠以懦怯廢事景以任刻
殘物武帝開置博望苑以通賓客賓客多以異術進者
而太子後遭巫蠱之禍唐太宗教其子者甚悉而聚麀
之恥實以身誨之宋時家法雖嚴而其所以為教亦不
切于身心性情之實夫漢唐宋所為天下計者未嘗不
甚詳而根本之地如此其曠畧此宜其立國僅僅至此

我太祖高皇帝創業垂統洪謨遠慮莫非三代之法而萬世之計立國之初庶務倥偬首建大本堂圖史充牣其中招延四方名賢為太子講論經理敷陳治道又為昭鑒錄使知前代太子諸王之善可為法而惡可為鑒而成祖文皇帝又為文華寶鑑蓋為學而不知先代之故則不足以有所感發而懲創成祖之書一本太祖之意雖一事之善惡皆在所錄者固以身為天下之所係善惡起于幾微而治忽之端在于此尤不可以不嚴也

今日欲舉三代之典繼祖宗之志亦宜有可言者矣愚
敢條其所當急者其一曰選宮僚昔太祖不設專官而
以公卿兼領以防後世離間之患夫銜雖列于朝班職
則專于訓導不宜徒取文學而用道德可為師表者家
丞庶子皆宜選用吉士以備其職二曰慎與處太子雖
有宮官而其所常與處者則保姆內侍小黃門之屬女
子小人導以非心尤宜防慮擇其淳德謹厚者而使之
漸涵灌漬于德義而不知三曰禮師傅夫尊卑之分懸

隔則官屬不得盡其忠昔懿文太子之於宋濂仁宗宣宗之于楊士奇其相親禮往復辨論如家人父子蓋太子有子道臣道不宜濶畧於師友之禮以成乖隔之患其四曰明實學世儒率謂天子之學與韋布不同文華進講不過採摭經中數條以備故事夫豈所以深探聖奧必先專一經以次而及其餘五曰辨儀等蓋富貴之極惟其所欲故周官有王后世子會不會之文所以撙節使之不過今宜飲食衣服悉有制度又使太子諸王禮

秩必異所以防微杜漸固萬年之基蓋天下之事莫大
于此者執事幸採而聞之于上

第三問

三代之樂不傳於世見於遺經僅有可考者君子追尋
缺軼于千百載之下因其辭以求其意得其意而後足
以會其辭然必其有以深探古人之心而會本末源流
于一而後可以斟酌古今擬議制度以為復古之漸而
未易言也當天下無事之時世之君子輒言曰興禮樂

夫禮樂豈易興哉自漢以至于今數千百年明君良臣
相與咨嗟太息講求掇拾卒無有復三代之舊者而儒
者又從而卑其說以為禮以養人為本少有過差是過
而養人也蓋謂隨世可以制作而不必盡合于三代而
不知三代之禮樂舍焉則天下無所謂禮樂者蓋三代
之制皆非一世之事自其初累世相因以為治而馴至
于大備雖代有變革而不過進退損益于其間故異世
而不可不襲者禮也其所不相襲者禮之末也殊時而

不可不沿者樂也其所不相沿者樂之末也夫以三代之聖人皆因于累世之故故其樂易舉而可行至于後世蕩然矣又無聖人者以起之而欲稽考于既廢之後豈不難哉樂之所從來久矣黃帝使伶倫斷大夏之竹兩節而吹之以為黃鍾之宮制十二筩以聽鳳鳴比黃鍾之宮而生之以為律本故後世皆宗黃帝之樂周禮大司樂以樂舞教國子舞雲門大卷大咸大韶大濩大武之舞分樂而序之奏黃鍾歌大呂舞雲門以祀天神

奏太簇歌應鍾舞咸池以祀地祇奏姑洗歌南呂舞大韶以祀四望奏蕤賓歌函鍾舞大夏以祭山川奏夷則歌小呂舞大濩以享先妣奏無射歌夾鍾舞大武以享先祖以九變而致天神地示人鬼固九韶六英六列之遺也黃帝之清角英招其本聲固在于此世人自莫能察而徒知求太古之音于洞庭之野而不知周家之盛固已備六代之樂而周官豈其偽書哉說者謂其所序圜鍾為宮黃鍾為角太簇為徵姑洗為羽此律之相吹

者也函鍾為宮太簇為角姑洗為徵南呂為羽此律之相生者也黃鍾為宮大呂為角太簇為徵應鍾為羽此律之相合者也樂之變數皆用其宮之本數黃鍾在子子數九故九變而終夾鍾在卯卯數六故六變而畢林鍾在未未數八故八變而止其究以感天神地示人鬼焉者非如昔人天社虛危類求之說也至和之氣寓諸器而託諸聲感應自然之理無所不通分天地人者所從言之異也虞書商頌推之固有合焉者矣文中子曰

化至九變王道其明乎故樂至九變而淳氣洽矣鳳凰
何為而藏乎蓋聖人之制隨時不同而非截然為數代
之樂成周兼而用之以六代之樂配十二調每樂二調
以一陰一陽相對而為之合其感動神示自有不容已
者故曰天之與人有以相通如影之象形響之應聲為
善者天報之以福為惡者天降之以殃其自然者也他
書所載師文師開之鼓琴師涓之寫濮上之聲其感薄
陰陽通于物類要其理有不可誣者惜乎周衰王者不

作天地之氣不應而淫過凶嫚之聲競以相誇浸淫于後世先王之制遂不可考漢之制氏僅能得其鏗鏘鼓舞而不能言其義其後河間獻王所得雅樂天子但令太常以時存肄不令奏郊廟其郊廟及所奏御皆俗樂淫聲西漢一代文章之盛名卿才士輩出而卒莫有能興禮樂者而亡國新聲代變日增自此以往豈復可冀耶前世號知樂者如荀勗阮咸張文收萬寶常王朴諸人卒亦未有以見之于用而牛弘何妥鄭譯李照阮逸

范鎮司馬光之徒紛紛莫決而士大夫之議常與工師之說相悖固有所謂訂正雖詳而鏗鏘不協韻辨析可聽而考擊不成聲偃偃焉如瞽無目而以手模指索狀物之形難矣此無他先王之制既廢後之人雖欲罄心思而測度摹擬于千百載之上不可得也故樂者漢以前有司掌之無不知其義漢以後儒者求之而卒莫得其數有傳與無傳之異又無先王以制之也雖然樂者千世一理而已矣不以有傳而存不以無傳而亡其始

在於人心人心之動物使之然也情動于中而發于聲
聲成文謂之音比音而樂之及于戚羽旄謂之樂千古
之人心不亡則千古之人皆可以制樂而世之論樂者
不求夫樂之本而區區于樂之數夫其數可知也其義
難知也知其義而本末一以貫之矣後之人不察而殫
精于璧羨尺度之間較量于累黍多寡之際致疑于鍾
律洪殺之節紛紜于五聲十二律變宮變徵之異夫樂
誠不可以舍器數而沒于氣數之中則其力愈勞而其

數愈失盍亦反其本矣太史公曰神使氣氣就形細若
氣微若聲聖人因神而存之雖妙必效莊周曰奏之以
天徵之以人行之以禮義建之以人情天機不張而五
官皆備此之謂樂無言而心悅者也古者百姓太和萬
物咸若聲律身度五音天音也八聲天化也七始天統
也秋養耆老而冬食孤子勃然招樂興大鹿之野然則
明君在上休養生民陶以太和萬物之生各得而天地
之沴不作然後吹律以生尺命神瞽以寫中聲以黃鍾

為聲氣之元則太和薰蒸八風順序鳳儀獸舞之治可
復追矣不然雖使置局設官招選天下知音之士以研
究律呂之精無不符于先王此為瞽史之事而非治天
下之本也

第四問

王者之興必有一代之臣以輔翼天下之治而成弘濟
之功夫有是君而無是臣則上常患于不得其下而君
之事無所寄有是臣而無是君則下常患于不遇其上

而下之才無所展然天將以開一代之治而啟其明良之會既生是君使之致摧陷廓清之功則必生是臣以致協謀參贊之力蓋天下之勢亂極而治天之愛民之深必不使之終于此也故聖人之生以安民也而聖人之於天下又非一手一足之烈也必得是人足以辦吾事者故賢臣之生以佐聖也自古大亂之世未有無聖人而可以致治者亦未有無賢臣而可以弘化者如雲龍風虎氣類自應相須而成相待而合而烏知其所以

然哉堯以前如風后力牧常先大鴻之徒非經所見不可得而論矣虞書所載九官十二牧班班可考者三代而下以革命而有天下則有如成湯有一德之伊尹而後有升陟之師武王有鷹揚之太公而後有牧野之會至于畢散周召之徒皆以聖人之德奔走後先禦侮疏附詩書所稱有大功以配享于先王暨其子孫藉其休以有國者數百年蓋其盛不可及矣三代而下漢高起布衣誅秦威項以有天下而淮陰絳灌之徒摧鋒陷陣

以致其百戰之功而其時稱蕭何韓信張良此三人者
為尤烈光武承王莽之亂奮迹南陽恢復舊物則有鄧
禹吳漢賈復寇恂馬援馮異岑彭來歙之徒宣其力唐
太宗舉兵晉陽平隋之亂則有劉弘基李勣李靖房玄
齡杜如晦之流致其勲宋太祖受周之禪去五代戰爭
之患致天下于太平則有趙普潘美曹彬之輩殫其謀
天下不可以無君故立之君立之君不可以無臣故生
之臣以佐之有堯舜三代之君則必有堯舜三代之臣

有漢唐宋之君則必有漢唐宋之臣天之愛民久矣不
如是何以戡定禍亂克成太平耶慨自宋失其馭自金
及元相嬗者數百年既而運窮數極天閔斯人之亂於
是生我太祖高皇帝于淮甸奮其神武於以拯天下之
禍而援生民之溺數年之間定金陵平吳會克荆襄闢
廣荒主遠竄息於狼望之北固宇宙以來所未有之勲
而聖人獨稟全智功高萬古神謨廟筭有非他人所能
贊其萬一者而一時諸臣應運而生皆起于淮甸之間

乘機邁會以成不世之勲有若高祖之豐沛光武之南陽者此豈人之所為哉蓋將以開我國家億萬年無疆之治故聖祖龍興于上而諸臣景附于下乘風雲之會依日月之光而昭諸鼎彝銘諸策府有非一時之所能殫述者其大勲光宣炳烺于天地之間如中山武寧王以下六王者其功尤烈天下之人至今能道之他如朱文正李文忠咸以內外之親而郭子興郭英吳良禎廖永忠永安之徒則以父子兄弟後先致力效死于其間

大抵數總大軍以不殺為威而沈毅好謀定大事于一
言武寧之功為大而開平之窮搜于漠北黔寧之收功
于滇南此方面之功之最著者其他或撫一城或定一
方或專城而秉鉞或分閫而受寄或敵愾以怒寇或殄
滅以為期孰非體天地好生之德勤皇祖安集之命有
功于方夏而惠于元元者乎國史之所紀載者固莫得
而覩而往往見於儒臣銘章碑志之間此愚生之所竊
識其萬一者因念百六十七年父子兄弟長養太平之

世方內無兵革之禍寇盜之警者固我高皇帝天覆地
載之功諸臣匡輔協之力不可少也書曰丕顯文武
克慎明德昭升于上敷聞于下惟時上帝集厥命于文
王亦惟先正克左右昭事厥辟越小大謀猷罔不率從
此之謂乎今太廟既已配享而功臣廟又有特祠金書
鐵券山河帶礪之盟于今不替邇者皇上又興滅繼絕
開廟藏覽舊記以昭元功之侯籍使開平寧河岐陽誠
意之賞復延于世我國家之酬諸臣者可以無憾矣顧

承平日久為其子孫者或驕溢于富貴而不能體乃祖
乃父之心時陷法禁從而棄之又所不忍而未免有厚
德掩息遘東布章之譏則高皇帝之大誥武臣文皇帝
之鐵榜訓戒今日誠不可不申明而訓勅之也書曰古
我先王暨乃祖乃父胥及逸勤予敢動用非罰世選爾
勞予不掩爾善茲予大亨于先王爾祖其從與享之作福
作災予不敢動用非德敬以為今日獻

第五問

古之為天下者養民之生後之為天下者聽民之自生
夫聽民之自生可也又從而取之取之可也而不求所
以為可繼之道則我之取者無窮而民之生日蹶民蹶
而我之取者將不我應國計民生兩困而俱傷其何以
善其後是不可不深思而熟慮之也我國家建都北平
歲輸東南之粟以入京師者數百萬舳舻相銜接于江
淮加以方物土貢金帛錦繡以供大官王服者歲常不
絕其取于民不少矣而比年以來民生日瘁國課日虧

水旱薦告有司常患莫知所以為計然惟知取于民而未知所以救菑捍患與民莫大之利也大抵西北之田其水旱常聽于天而東南之田其水旱常制于人蓋其地有三江五湖之灌注而東南又瀕海有隄防蓄泄雖恒雨恒暘而可以無虞故昔之言水利者先焉禹貢三江既入震澤底定震澤即今太湖周禮所謂具區五湖蓋地一而名異也爾雅具區郭景純云吳越之間有具區周五百里故曰五湖也其言五湖猶江之言九江爾

春秋越與吳戰于五湖豈太湖之外復有四哉其所謂
具區洮隔彭蠡青草洞庭及季氏圖彭蠡洞庭巢湖太
湖鑑湖為五湖者非也禹治揚州之水西偏莫大于彭
蠡而東偏莫大于震澤欲寧震澤之水在於疏其下流
三江入于海而後震澤無泛濫之虞震澤固吐納衆水
者也西北有宣歙蕪湖荆溪宜興溧陽溧水數郡之水
西南有天目富陽分水湖州杭州諸山諸溪奔注之水
潴聚于湖而由震澤吳江長橋東入松江青龍江而入

海溧陽之上古有五堰以節宣歙金陵九陽江之水宜興之下有百瀆以疏荆溪所受之水江陰而東有運河泄水以入江宜興而西有夾苧干與塘口大吳等瀆泄四水此治其原委之法也三江東南泄水之尾閭也三江之流不疾則海潮逆上日至淤塞而下流不通此吳淞江之疏導不可不先而凡太湖以下諸江之入于海者皆不可以不加之意也昔宋單錠嘗疏東南水利書蘇文忠以為有利于民條其事于朝而亦莫能行之者

大抵承平日久人習于苟安稍有建國家之計必以為迂遠動衆而不可用故經國之慮每至于格而不行夫自漢以來天下之用不盡于東南至唐宋而東南之民始出其力以給天下之用然自吳越竊據于此乃能修水利以自給外以奉事大國而內不乏於朝府之用是以其國不困而民猶足以支及天下全盛江南不熟則取于浙右浙右不熟則取于淮南于是圩田河塘因循隳廢而坐失東南之大利以至于今夫錢氏以一方用

之惟其治之也專故常足于用今以天下用之惟其治之也泛故常不足于用嗚呼以天下之大而無賴于東南則可以坐視而莫為之所以天下之大而專仰給于東南其又何可不考其利病而熟圖之也先朝周文襄公夏忠靖公治之常有成績矣然百餘年來已非其故有司案行修舉故事已漫然莫知其故迹之所存矣至又委之國貧民困夫國貧民困已矣任其困而貧也則將何時而已乎夫亦延訪故老徧考昔人之論而求今

日之所宜又不必專泥于古之迹而惟視夫水勢之所
順蓋古今天時地勢陵谷丘淵代有變移必欲鑿空以
尋故迹吾恐力愈勞費愈廣而迄不可就反為苟安目
前者之所嗤笑禹之行水行其所無事而已矣五堰百
瀆可復則復之白蜺安亭青龍江可開則開之或為縱
浦或為橫塘或置沿海堰身堰置斗門使渠河之通海
者不湮于潮泥堤塘之捍患者不至于摧壞而又督成
水利之官常時相視禁富人豪家碾磴蘆葦茭荷陂塘

壅礙上流而倣錢氏遺法收圖回之利養撩清之卒更
番迭役以浚之而後利興而可久害革而民不困不然
如近者嘗浚白茆曾幾何時漸就湮塞此可懲也今夫
富人有良田美庄猶不使之荒蕪而加意焉況東南以
供天下之費乎抑是法也非特可以行之東南也齊魯
之地非古之中原乎數日不雨禾俱槁死黃茅白草一
望千里父子兄弟束手坐視相率而為溝中之瘠凡以
溝渠之制廢也謂宜少倣古匠人溝洫之法募江南無

田之民以業之蓋于古吳則通三江五湖于齊則通淄
濟之間滎陽下引河東南為鴻溝以通宋鄭陳蔡曹衛
與濟汝淮泗會而朔方兩河河西酒泉皆引河關中漳
渠靈軹引諸水東海引鉅定泰山下引汶水皆穿渠溉
田萬餘頃豈獨三江五湖之為利哉舉而行之不但可
興西北之利而東南之運亦少省矣天下之事在乎其
人毋徒委之氣數而以論事者為迂也

隆慶元年浙江程策四道

問自昔帝王立極垂統為後世計如禹有典則湯
有風愆文武有謨烈其子孫能敬承之故夏商皆
饗國長世周過其歷至于八百年漢唐而下蓋莫
能比隆焉我太祖高皇帝受天明命誕受多方在
御日久萬幾之暇輒親著述睿思玄覽自身心以
至於天下國家無一事不有垂教而祖訓一書為
聖子神孫慮尤諄悉矣其大經大法世世遵守昭
如日月固不待贅述也乃若微言至論為今日聖

天子之繹思者可得而詳言之歟我世宗肅皇帝
憑几之言告戒深切皇上孝思罔極遵承末命改
元一詔風行雷動乃至荒陬絕徼含齒戴髮之民
靡不拭目以觀德化伏讀詔旨稱郊社等禮各稽
祖宗舊典斟酌改正有以仰窺聖天子法祖之盛
心矣詔條所列固首奉皇考之教中間與皇祖之
訓相符契者亦可述其槩歟夫臣子為君父陳烈
祖之訓蓋忠愛之至也即有大美而弗彰何以仰

答鴻庠子萬一乎諸士子具悉以對將為爾問于

當宁

帝王之御天下也欲垂萬世之統者必欲其謀慮之遠
欲保萬世之業者必致其嗣守之勤謀慮以垂統仁之
周也嗣守以保業敬之至也是故德業光昭而心源繼
續顯承丕大而佑啟無疆自古有天下者其祖宗肇之
于前而子孫繼之於後所以長世而不替者用此道也
請因明問而陳之昔唐虞之際以天下相授受而示之

以精一執中之旨彼其平時都俞吁咈相告語于一堂之上者無非此道然猶咨命之諄諄者誠以天下重器不能不為之長慮也故以天下與人而并以治之之道與之斯知所以與天下矣受人之天下而并其治之之道受之斯知所以受天下矣不然徒以天下相傳則非堯之所以授舜舜之所以授禹也夫三聖人面相授受而猶如此況祖宗之天下傳之子孫而能不為之長慮乎誠念今日得之之難而他日保之之尤難故垂訓以

為子孫計者不容不詳且切焉是故聖有謨訓明徵定
保禹惟有是訓也而其子孫能敬承之有夏之歷至四
百年聖謨洋洋嘉言孔彰湯惟有是訓也而其子孫能
克從之有商之歷至六百年文武宣重光莫麗陳教故
子孫嗣守大訓無敢昏渝有周之歷至八百年蓋禹湯
文武為其子孫慮天下者如此其周而啟太甲成康所
以保天下者如此其至也我太祖高皇帝受命自天奄
有函夏聖武神文天經地緯削平僭亂海宇乂寧登天

下之賢俊相與修明政刑暇則又親灑宸翰睿思所及
動輒成書如存心省躬諸錄以至孝慈女戒昭鑑其大
者如三編大誥資世通訓洪範之註及又以意命羣臣
纂修寶訓律誥職掌集禮諸書自古帝王著作之盛未
有如此之富也若祖訓錄特為聖子神孫深遠之慮尤
詳且切矣嘗自敘以為創業之初備嘗艱苦人之情偽
亦頗知之自平武昌以來豫定律令頒而行之至于開
導後人復為祖訓一篇立為定法大書揭于西廡朝夕

觀覽以求至當首尾六年凡七騰稿而定我子孫欽奉朕命不負朕垂訓之意天地祖宗亦將孚佑于無窮矣于是頒賜諸王且錄于謹身殿乾清宮東宮壁因顧侍臣曰朕著祖訓錄所以垂訓子孫朕更歷世故創業艱難常慮子孫不知所守故為此書日夜以思具悉周至紬繹六年始克成編後世子孫守之則永保天祿大哉皇言誠萬世聖子神孫所宜欽承而敬守之者也是書之目有曰聖訓首章又有曰持守曰嚴祭祀曰謹出入

曰慎國政曰禮儀曰法律曰內令曰內官曰職制曰兵
衛曰營繕曰供用其篇袞簡要而條貫靡遺綱領宏大
而精微具悉歷世保之以為大訓至于朝廷之典章百
官有司之所行有不待盡述者請舉一二明言之有曰
凡古帝王以天下為憂守成之君常存敬畏以祖宗憂
天下為心則宜永受天之眷顧夫聖祖起自布衣同時
僭王叛國芟夷殆盡海內曠然尤且惴惴然懼天下之
起而相軋也況自古承平之久無常靜之國而南面之

奉可以娛耳目悅心意者交引于前人主能時懷警惕而淵涓獲獲之中此心卓然清明則宴安之欲不生而慮周于天下釁孽之萌無所作矣今日之所當繹思者此也又謂憂常在心則民安國固蓋惟望風雨以時田禾豐稔使民得遂其生又謂四方水旱當驗國之所積優免稅糧歲雖無災擇地瘦民貧亦優免之夫聖祖雖在深宮之中乃至祁寒暑雨靡不關心當時庶事草創建都封邑征伐四方用度廣矣而免租之詔無歲不下

今天下宴然而大司農往往告乏歲一不登議改折帶
徵有司且相顧以為曠恩矣使閭閻不被免租之惠民
何以聊生聖主顧畏民喁思小民之依簡勸農之官廣
蠲貸之澤則海內之民樂生矣今日之所當繹思者此
也又謂帝王居安常懷警備動止必詳人事審服用仰
觀天道俯察地理皆無災變然後運用疑有闕文夫聖祖躬
撝甲冑出入兵間及為天子猶謹備之如此人主必當
儼神明之居慎出入之際端拱穆清正容謹儀和鸞之

節清道而行開延英閣以登魁磊耆艾之士朝夕燕見
紬繹顧問考古驗今則聖德日脩天眷日隆亦不勞心
于非意之防矣今日之所當繹思者此也又謂平日持
身之道無優伶近狎之失無酣歌夜飲之歡正宮無自
縱之權妃嬪無窺恣之專又謂內府飲食常用之物設
局于內職名既定要在遵守故當時日歷聖政記所稱
后妃居中不預一髮之政外戚亦循理畏法無敢恃寵
以病民寺人之徒惟給掃除之役本朝家法超絕前代

如此至今陰教修明后宮順序尤望體聖祖述周禮設局之義修掖庭永巷之職使戴金貂之飾者有濟濟謹孚之美無戲敖驕恣之過左右勅正則王爵天憲不至旁落矣今日之所當繹思者此也又謂四方荒服得其地不足以供給得其民不足以使令吾恐後世子孫倚中國富强無故興兵致傷人命但元孽與西北邊境至相密邇累世戰爭必選將練兵以謹備之今日禦西北之寇其上策在于不攻其無策在於不善守謹備邊塞

驅而出之居中制外之道惟此而已若欲開邊隙以快
心于狼望之北必無幸矣聖祖嘗戒諸王遠出開平謂
守邊之要未嘗不以先謀為急故朕于北鄙之備尤加
慎密今日之所當繹思者此也我世宗肅皇帝導揚末
命告戒深切我皇上改元一詔實奉皇考之教明詔所
謂仰惟末命之昭垂深望繼述之兼善者也夫郊社等
禮所以遵祖訓者莫大于此若夫言官加恤錄之恩方
士致左道之辟宗室解甸人之繫若盧施寬釋之仁百

司嚴黜陟之典銓選破資格之條冗員申裁省之令郡縣別望繫之差沒北布招懷之惠殫敵速上功之簿至于重貪墨之罰督勸覈之報舉大臣之贈諡加閒散之名服聽監司之薦辟所謂推類以盡義通變以宜時有難盡述者明詔又曰各地方官以武備為不急以玩寇為苟安將賊盜妖逆隱蔽縱容不早撲滅往往釀成大患祖訓所謂憂天下者明詔得之矣又曰天下軍民十分窮困國用雖詘豈忍照常徵派四方聞之孰不感泣

田租逋負改折蠲免與夫大官之所增派尚方之所趣辦繕部之竹木兵曹之子粒多所停罷則祖訓所謂憂民者明詔得之矣又曰內府各衙門供應錢糧朕加意節省自有餘又令戶工二部科道稽查各監局庫段足軍器香蠟等物祖訓所謂內府設局與周禮天官之義合者明詔得之矣若夫求賢納諫不一而足凡可以正士習糾官邪安民生足國用等項長策仍許諸人直言無隱此即祖訓所謂防壅蔽而通下情也然則與皇祖

之訓蓋無不相符契者宜天下之人如履而起如瞶而聞含齒戴髮靡不拭目以觀德化之成也顧愚生猶惓惓于皇上之繹思者實臣子忠愛之忱不容已耳書曰我受天命丕若有夏歷年式勿替有殷歷年欲王以小民受天永命愚竊以為今日聖天子頌焉

問我祖宗列聖世有實錄表年紀事撰述功德以為信史邇者皇上深詔近臣纂修世宗肅皇帝實錄載筆之臣必能仰體宸衷勒成鉅典然竊以先

皇帝享國最久年載曠悠又無前代記註之書編
摩摭輯成一家之言若有未易然者矣夫實錄之
名何所起歟抑古之論史每難其事昔劉子玄與
宰相言二史不注起居而歐陽永叔論日歷之廢
蓋近代為史之通患而子玄又謂史有三長至曾
子固序南齊書其論美矣二子之言後世多稱之
可得而備述歟茲者先皇帝彙進史館方當下之
學官諸士子皆得而與知者宜以所聞著之于篇

其毋讓焉

經綸世道者立一時之功纂述先猷者垂百世之訓大
哉國史所從來久矣上古帝王繼天立極功德與天地
同流其不可傳者與化而往矣其可傳者獨賴有史以
存之故巍然煥然之迹亦與天地而同久雖在千百世
之下而神明之號天下之人皆得指而稱之何者其托
于史者無窮也夫垂徽名而記往號昭遠古而示方來
史之所繫其重如此邇者明詔纂修我世宗肅皇帝實

錄通行海內博採遺事明問特舉以策諸生敢不具述

所聞以對夫左右史以記言動自夏殷以前已有之周
官大史小史內史外史御史皆史官之職事而諸侯各
有國史迄于戰國紛爭秦滅典籍而史官尚存漢武帝
以司馬氏為太史東京則班固為蘭臺令史劉珍等著
述東觀皆天下之選故史記兩漢書冠絕後代自後史
館著作莫不妙簡其人雖其文辭不能方駕前古亦各
一時之美而陳壽以下悉倣漢書之體往往類萃諸家

別錄而斷代以為正史正史之外自唐武德間房玄齡
許敬宗敬播等相與立編年之體而實錄之名自此始
太宗以下十五帝每至易位必纂實錄惟獨宣懿之後
以亂故缺然及五季宋元皆因之而後之為史者以之
為依據至我朝列聖相承一如前代故事每世必命纂
修固已敷宣景耀崇闡大猷金匱之藏永世作典祖宗
之洪業真與天地永久矣我皇上嗣登寶位甫當朝廟
之日即降綸音特命纂修實錄天下皆仰聖人孝思罔

極繼志述事之大也洪惟我世宗肅皇帝以上聖之資撫中興之運上比列聖二祖五宗饗國獨為長久嘉靖以來四十五年振古之事曠世之勲特異疇昔包括旁羅錯綜銓次在于今日實為重難嘗考國初猶設起居注而大明日歷聖政記則學士宋濂所撰其序以為幸得日侍燕閒十有餘年書之頗為得實使他日修實錄者有所採掇以傳信于來世自起居之官不設而史館論撰亦鮮則今之修史可以藉手者蓋寥寥矣夫千金

之裘非一狐之腋也臺榭之榱非一木之枝也史家所
因惟有博採自司馬氏猶取左氏國語世本戰國策班
書則世皆以為司馬遷王商揚雄歆向之筆自古以來
未有不裒聚衆家而成者故唐宰相撰時政記史官撰
日歷而宋則宰相主監修學士主修撰兩府撰時政三
館修起居注此等之類今並廢缺而欲以責成于一旦
蓋因仍者之易為力而創造者之難為功也我先皇帝
大制作大建置固昭然揭諸日月天下之人所共知之

若夫深宮祕庭動靜起居羣臣不能記也聖性之淵懿聖德之精微如堯之安安如舜之濬哲羣臣不能測也至于類取諸司供報博採羣臣墓銘家狀夫進退百官剖決章奏裁處萬幾錢穀甲兵四夷之事百官有司典籍雖在視諸故府似乎有徵然曹分局別歲殊月改綴緝穿聯欲無牴牾固亦勞矣而一時臣工人品之淑慝心迹之疑似殊功偉德非常之事姦宄凶慝禱枉鬼瑣之形墓誌家狀不足盡也蓋古之為史者易於有所因

雖遷固之才不能無因而為也今之為史者難于無所
述雖有遷固之才無以自見矣當唐宋之世史官尚未
放失而劉子玄為蕭至忠言五不可其一謂漢郡國上
計太史以其副上丞相後漢羣臣所撰先集公府乃上
蘭臺故史官載事為廣今史臣惟自詢采二史不注起
居百家弗通行狀若今之起居廢失得無如劉子玄之
所論乎歐陽脩以為史官職廢其所撰述簡畧百不存
一至于事關大體沒而不書加以時政日厯起居注例

皆積滯相因故追修前事歲月既遠遺失莫存聖人典
法遂成廢墜若今之追修積滯得無如歐陽修之所論
者乎然則所貴良史裁酌體例旁采異聞攷求真是發
憤討論使歸于一古人有言所見異詞所聞異詞所傳
間異詞先朝之事尚在所見則已異于所聞與所傳聞
遠矣抑嘗讀武帝本紀諸志表傳皆史遷當時撰述而
班固陳宗尹敏孟冀共成光武本紀後漢列傳載記當
時紀志蓋不廢也自寶錄專行則紀志殆廢此尤史家

之闕典竊以為實錄之外宜用擬古遷固之書此不當待後世而定也先皇帝大禮郊祀九廟明堂先聖祀典耜田親蠶章服禮儀河渠刑法諸所興建散入紀年難以會通當令首尾貫串包絡彙粹可做司馬遷八書而為之宰相百官報罷不常可做公卿志表為之羣臣之善惡四夷之叛服則列傳載記皆不可廢此即一代之史非直俟數百年之後而為也徒恃實錄一書所軼多矣此方今史館之所當議者也愚又謂漢史成于班固

唐歷緝于吳兢柳芳崔魏唐書成于吳兢韋述于休烈
令狐峘宋國史凡三書後洪邁復請合為九朝而續通
鑑長編成于李燾本朝二百年歷列聖而未有統會之
史此亦方今史館之所當議者也抑劉子玄又云史有
三長才學識有學無才如愚賈操金而不能殖貨有才
無學如巧匠無榱桷斧斤不能成室善惡必書使亂臣
賊子知懼此為無可加者曾子固為南齊書目錄序云
古之所謂良史者其明必足以周萬事之理其道必足

以適天下之用其智必足以通難知之意其文必足以
發難顯之情而後其任可得而稱也噫能如子玄之論
得為良史矣若子固所稱則又追遷固而上之蓋唐虞
三代之史官也茲者明詔採取遺事諸生幸得躬逢其
盛惟時金馬石渠之彥宜有其人愚生草茅下士獨能
誦習舊聞而已述作大義何敢僭及之

問古者國有大事必合天下之議所以集衆思也
王通氏著續書嘗曰議其盡天下之公乎夫黃帝

有合宮之聽堯有衢室之問舜有總章之訪皆議之謂也黃帝堯舜尚矣三代以下惟漢近古請舉漢之議者其或是或非或罷或行亦有可論者乎夫匡衡張譚郊社之說何據貢禹韋玄成祖廟之議何本董仲舒師丹之請建限田何罷而不行祝生唐生之請罷鹽鐵何議而不用公孫卿壺遂司馬遷改朔之議何取賈讓關並韓牧王橫治河之策孰得先誅先零之謀何以卒從趙充國罷邊塞

置吏卒之請何以卒用侯應此皆漢之大事而有
國家者之所當攷昔韓退之非三代兩漢之文不
敢觀諸士子皆通經學古以待有司之求必有能
及之者請言之以觀所學

欲盡天下之理者必并天下之智欲并天下之智者必
兼天下之謀并智合謀而天下之公盡矣天下之公盡
而天下之理得矣故古者國有大事常令議臣集議不
專于一人不徇于一說惟其當而已是故大臣之言必

用小臣之論必庸衆思之集必繹一夫之見必伸故丘
山積卑而為高江河合水而為大人合併而為公此
古之帝王所以用天下之議也王通氏論帝制恢恢乎
無所不容天下之危與天下安之天下之失與天下正
之千變萬化而吾守中焉故曰議其盡天下之公乎漢
制大夫掌論議事有疑未決則合中朝之士雜議之自
兩府大臣下至博士議郎皆得盡其所見而不嫌于以
小臣與大臣抗衡其道公矣若明問所及皆一時朝廷

之大務然非當時能詢採博議盡天下所欲言何以桀
然著于簡策如此請為執事言其畧古之帝王郊祀天
地以冬日至于地上之圜丘以降天神夏日至于澤中
之方丘以出地祇故祭天于南郊就陽位也祭地于北
郊即陰之義也漢之郊祀多襲秦故武帝巡祭天地諸
神名山金泥石記淫誣甚矣成帝初匡衡張譚始建南
北郊之議以甘泉河東之祠非神靈之所饗宜就正陽
太陰之處于是始作長安南北郊罷甘泉汾陰祠漢二

百年間郊祀不經文帝賢主猶拜灊渭之會相如文士
獨留封禪之書匡衡能本周禮正一代之大典論者或
恨其不能盡復三代郊祀明堂配天之文然其所論建
亦偉矣禮王者受命為太祖以下五廟而迭毀毀廟之
主藏之太祖之廟五年而再殷祭則毀廟未毀廟之主
合食于太祖父為昭而子為穆孫又為昭王者禘其祖
之所自出而以祖配之以其始受命而王故尊以配天
而不為立廟親盡也太祖以下五廟則親盡迭毀示有

終也漢之祖廟至元始之際大禮未備貢禹始發之韋
玄成已議罷郡國廟又本禮經所云而建議如此惟獨
以高帝為太祖之廟而孝文以後皆以承後屬盡宜毀
故許嘉劉向更議以文武皆為宗漢二百年間祖廟無
准賈生通達不著宣室之對劉向博雅附會家人之語
玄成能依古義垂一代之大法論者猶疑其五廟七廟
廟數之殊然其所考據亦正矣自秦用商君之法開阡
陌除井田之制漢初不為限制累世承平豪富吏民皆

數鉅萬而貧弱愈困故董仲舒欲稍近古限民名田以塞兼并之路師丹言古之聖王莫不設井田然後可致太平今未可詳請畧為限武帝方事四夷內興功利宜未及此而丁傅董賢隆貴用事詔書雖下亦寢不行然至後魏孝文獨用李安世均田之法則仲舒師丹之說其果泥乎後之有天下者能知此意則井田雖未可復而均田之法亦可少倣也自齊用管子之術正鹽筴斂山澤之利漢初以屬少府武帝用東郭咸陽孔僅筦其

利郡國多不便昭帝始詔賢良文學之士問民所疾苦
教化之要九江祝生等抗言皆願罷鹽鐵酒榷均輸毋
與天下爭利示以儉約而桑弘羊獨以為國家大業所
以制四夷安邊足用之本竟不果罷自此迄于永平尋
罷尋復然後魏宣武嘗采甄琛弛禁之表則賢良文學
之議其果迂乎後之有天下者能知此意則鹽筴雖未
可廢而取利之法亦不當甚密也漢自襲秦正朔晦朔
月見弦望滿虧多非是張蒼名習歷而仍水德之謬公

孫卿建改朔而信黃龍之誕百年歷紀之廢甚矣司馬
遷倪寬等始謂帝王創業改制不復用傳序則今夏時
也三代之統絕而不序請定考天地四時之極則順陰
陽以定大明之制為萬世則于是招致方士唐都分其
天部洛下閎運筭轉歷然後日辰之度與夏正同昔孔
子論為邦言行夏之時馬遷之議實本于此此古今治
歷者之不能易也漢自武帝塞瓠子其後河復數決大
為東郡害平當領河堤奏賈讓之策桓譚典羣議集關

並韓牧王橫之論一代治河之說備矣賈讓謂古者立國居民疆理土地必遺川澤之分度水勢之所不及大川無防小水得入陂障卑下以為汙澤使水有所休息因欲徙冀州之民當水衝者決黎陽遮害亭放河使北入海河西薄大山東薄金堤勢不能復遠汎濫讓之此策視諸說最高昔大禹治洪水惟順水之道此古今治河者之所當知也夫明王之御外國非以極兵勢也誠盡謀而已西羌之反朝廷發兵及屯田者六萬人酒泉

太守辛武賢欲分兵並出張掖酒泉合擊罕开趙充國
獨以為敵即據前險守浚阨必有傷危之憂獨欲捐罕
开之罪先行先零之誅以震動之方是時公卿議者不
同而充國獨守便宜璽書切責堅不為動卒不煩兵而
自解散諸羌罷騎兵留屯田以待其敝大抵西羌之反
其萌在于解仇充國急赴罕开之約使先零不得先其
約此所以坐而得勝筭也故制勝之要若使寇盜得締
其交非中國之利也漢自單于入朝加賜皆倍于黃龍

時既自以親好願保塞上谷以西至燉煌請罷邊備塞以休天子人民時羣臣以為便而候應以為北邊塞至遼東外有陰山東西千里草木茂盛本冒頓依阻其中來出為寇至武帝斥奪此地攘之于幕北設屯戍以守之如罷備邊戍卒示遠人之大利夫雁海龍堆天之所以紀華夏也炎方朔漠地之所以限內外也國家苟與遠人共地利而無藩籬之限則中國坐而受其困由此言之中國之要害所當固守而不可失也夫郊祀宗廟

井田鹽鐵歷律河渠四夷舉漢之大事而崇論竝議槩具于此今廟堂方有郊社宗廟之議而天下田賦未均鹽課折閱歷紀漸差授時之度徐沛歲有治河之役兀良哈之屬國翻為外應受降城之故地棄為賊巢則此數者正今日之所宜攷毋謂漢卑而不足法因是而亦可以畧追三代之遺文古義所謂法後王者謂此也

問六經之教未嘗專以仁為言至論語一書孔門之論仁始詳今觀孔子之荅問者數矣而皆不同

何歟夫若然者則仁宜可以人人而至也然孔子之所許者蓋鮮矣當時惟稱顏子三月不違若仲弓冉有子貢公西華門人之高第令尹子文陳文子春秋之賢大夫孔子槩稱之而獨不許以仁顧惟于微子箕子比干而謂之三仁于伯夷叔齊而稱為得仁至管夷吾伯者之佐而亦曰如其仁抑又何歟夫以仁之難造如此而又謂博施濟衆何事于仁必也聖乎則仁與聖猶有等歟後之學者

皆以為孔子未嘗言仁而特與弟子言其用功之方耳其果然歟如此則果何以謂之仁乎士人自知學即讀論語而不求其意祇見諸說之紛紛而無所取衷也茲欲會而通之必有至當不易之論試言其大旨以觀自得之學

甚矣仁之難言也非言之難而體會之難能體會之而自得之于心則能以其所不同而求其所同以其所言而知其所不言雖聖人之於學者隨人異施不可以一

端求會而通之而至精至粹之理一而已矣夫惟天下之論仁者病于不能自得之于心而徒言之求是以若彼其紛紛而不一也執事發策以孔子之言仁為問欲觀學者自得之學愚生何知焉雖然論語一書童而習之敢不撫拾以對昔孔子傳堯舜禹湯文武周公之道志欲有所為于天下而時不能用退而追述三代之禮樂序詩書易春秋以備王道成六藝夫子自以為教天下如此盡矣夫子既沒而門人記其微言以為論語顧

若稍不盡同于前古聖人者蓋其平日獨以仁之一言
為教則皆先聖人之所未嘗數數然者雖其孫子思傳
之亦不盡用其說孟子稍稍言之而復以仁義對舉又
非若夫子當時之獨指而專言之也蓋嘗思之夫子以
仁聖並稱而又有仁人之號則其所謂仁者夫亦以其
人品之至精至粹而已矣夫如是故以仁聖並言之而
當時學者雖其才器不同而其學于聖人固其志舉欲
造于至精至粹之地是以諸子之問仁特詳而夫子之

告之不一要其因才成就而使之造于至精至粹之地者則一而已矣世之君子見諸子之問而夫子告之其不同如此遂疑其所謂仁者支離而難合散漫而不可求而不知其所以至之者一也惟其才器不同引而進之各異譬之于水其可以導之于江者引之以至于江導之于河者引之以至于河導之為淮漢者引之以至于淮漢及其不已而至于海一也夫子之門顏子仲弓子貢子張樊遲司馬牛人見其皆入聞夫子之道而不

知其才器相去遠矣然夫子皆不逆之隨人以為之成
就使此數子者能遵其教而莫不可至于仁是乃夫子
之善教也使是數子者夫子獨舉其一而皆告之是使
樊遲而欲為顏子夫子必不若是之誣也然而此數子
者亦皆可至于至精至粹之地者何也若孟子之所謂
伯夷聖之清伊尹聖之任柳下惠聖之和孔子聖之時
也伯夷伊尹柳下惠夫豈方于孔子顧謂之聖則亦造
于至精至粹之地而已矣譬之于玉為玫為琕為琳為

珉之不同而追琢之成器一也故夫子于微子箕子比
干伯夷叔齊而皆謂之仁豈可同哉管夷吾者能以功
利之術使諸侯歸齊而不能勉其君至王也而以為如
其仁管仲之仁豈又與微子諸人可同日論哉夫子之
門人可與語聖人者惟顏子與夫子皆步皆趨皆言皆
辨皆馳矣而獨所謂仰之彌高鑽之彌堅瞻之在前忽
焉在後未能與化為一也然亦已進于仁矣夫子以用
之則行舍之則藏與之同其出處則所謂克己復禮者

蓋以有天下之事告之故以為天下歸仁也若仲弓出門使民而至于邦家無怨則南面諸侯之任而已顏子與仲弓同居德行而相遠如此其為仁者不同如此而況子貢以下哉子貢之聘于諸侯所以有大夫士之交也子張之問政所以言恭寬信敏惠也樊遲之不知禮義信以成德所以言先難後獲也司馬牛多言而躁所以言訥言也然于是數者而進之豈不亦皆至于仁哉夫人之才器有大小至于至精至粹之地為難故孟子

以伯夷伊尹柳下惠為聖而夫子亦以微子箕子比干
伯夷叔齊為仁夫子之所謂仁孟子之所謂聖也然數
子者夫子告之則如此而造而至之實難故雖果如子
路藝如冉有不佞如雍禮儀如赤使之治國家理人民
立朝著夫子皆許之而不許以仁以其至于至精至粹
之地為難也當時之大夫忠如子文清如文子使之事
伯朝去亂國夫子皆許之而不許以仁以其至于至精
至粹之地為難也若夷齊讓國逃隱微子箕子比干之

或去或奴或死積仁潔行以自靖自獻于先王豈不至
于至精至粹之地哉管子者聖人蓋未之許若曰其于
仁者之功特如之而已然則是數子者夫子特進之而
已終莫能至也夫仁之精微與聖同極而他日子貢問
博施濟衆乃以為何事于仁而必以聖當之似若夫子
之優聖而劣仁而不知其意蓋以為博施濟衆者聖人
身外之事業立人達人者仁者切己之實功子貢未可
驟以唐虞之事許之亦勉以忠恕而已矣故曰賜也非

爾所及也雖然夫子之于仁也豈終日為學者瀆言之
如此蓋皆因其有問隨其人而告之孟子之所謂答問
者也當時高弟弟子如顏子之外曾子未嘗問仁而一
貫之唯豈不亦謂之仁哉而後之儒者又謂夫子平日
蓋未嘗言仁也特言其所以為仁者而已然則夫子之
論仁當見于何書曰夫子于繫易曰大哉乾元萬物資
始乃統天又曰元者善之長也此夫子之所謂仁者也
雖然夫子豈有隱哉凡平日之所以問答者皆此理也

宋張敬夫嘗類聚夫子之論仁以為洙泗言仁錄朱子
不取謂聖人之言隨其所在皆有至理不當區區以言
語類求之可謂得其旨矣後之學者去聖愈遠其尊聖
人為太過至或舍其終日應用與所以進德修業之實
而欲于虛空想像之中求所謂仁者而名狀之夫天下
皆知佛老為空虛之說以惑世而後之儒者不求切實
之功舍夫子之所謂仁而於空虛想像之中求所謂仁
此亦何以異于佛老之說也

震川別集卷二上



總校官庶吉士臣張能照
校對官編修臣周厚輅
謄錄監生臣李維翰

欽定四庫全書薈要

集部

震川別集卷三

二下

詳校官侯補通政司經歷臣郭祚熾




欽定四庫全書舊要卷一萬七千一百十五

集部

震川別集卷二下

明 歸有光 撰

 應制策

浙省策問對二道

問今之浙省古會稽并鄞郡之境儒林之盛著於
前史古未暇論自洛學沒被東南而浙士有親及
程氏之門與受業于其門人者其人果可稱歟朱

子集諸儒之大成陸子靜崛起江右二家門人傳受之緒其可述歟其與朱子並時而起者果亦有聞于道歟其能纂述朱氏之學亦有可言歟其以文章名世者于道亦有所得歟諸士子生長斯地景行先哲久矣願相與論之

執事先生以浙中道學之傳歷歷下問顧愚非其人何敢與聞于斯然古者祀先聖先師于學所謂先師即其國之賢者明有所嚮仰也浙之諸君子愚生亦竊識之

矣昔楚威王有問于莫敖子華子華對以楚之先令尹
子文以至蒙穀五臣之事楚王太息嘉其能善語其國
之故吾浙之儒者所謂齊魯諸儒于文學自古以來其
天性也敢無述焉蓋嘗謂士之所以自成者莫貴于學
學莫貴于聞道知所以求道矣而後知其所以為學知
其所以為學矣而後能有以自成其于修身齊家治國
平天下不難也秦漢以下其經學文章功業節行稱于
天下代不乏人而大要歸于不知道而以氣質用事故

其所就不能庶幾于三代蓋千五百年而宋河南程氏起而紹明之其澤流被于閩粵間此朱子所由以得其傳者也至于兩浙又河洛閩粵所漸被者也然程子之門惟游楊謝號稱高第弟子而吾浙之士及門者周行已能發明中庸之道浙中始知有伊洛之學而劉安節戴述知求成已之方以文行推重而元承天資近道敏于問學此門人之尤章著者也自龜山載道東南學者多從之遊而宋之才能得程氏正脉喻樗推明中庸大

學論語之旨王師愈從受易論朱子稱其有本有文德
望為東州之冠此受業于程氏之門人也自羅從彥
從學于龜山再傳而為李侗侗授之朱子學者以為程
氏正宗陸九淵起于江西超然有得于孟子先立乎其
大者之旨二家議論初有不合其全體大用之盛皆能
不謬于聖人其學皆行于浙中輔廣徐僑初事呂祖謙
後從朱子偽學之禁學者解散廣不為動而五經解詩
童子問多所發明僑以朱子之書滿天下不過割裂掇

拾以為進取之資求其專精篤實能得其所以言者蓋
鮮其學一以真實踐履為本葉味道對策率本程子告
人主以帝王傳心之要然朱子門人黃幹為最著何基
師事幹得聞淵源之義王栢捐去俗學從何基基告以
立志居敬之旨金履祥事王栢從登何基之門論者以
為基之清介純實似尹和靖栢之高明剛正似謝上蔡
而履祥親得之二氏而並充于已者也其後許謙學于
履祥其學益振及門之士著錄者千餘人自基以下學

者所謂婆之四先生以為朱子之正適者也子靜之門人則楊簡篤學力行為治設施皆可為後世法清明高遠人所不及而袁熒端粹專精每言人心與天地一本能精思慎守則與天地相似舒燐刻苦磨勵改過遷善沈煥人品高明不苟自恕朱子嘗言與子靜學者遊往往令人自得蓋浙中尤尊陸氏之學而慈湖其倡也二家門人相傳之緒于婆之四先生四明之楊氏可謂光明俊偉能紹其傳者矣雖末流門戶各異而朱子所謂

子靜平日所以自任欲身率學者一于天理而不以一毫人欲雜于其間者其為夙出千古不可誣也今推原程子之學自龜山至于朱子朱子之後為婆之四先生象山之學雖行于江西而慈湖為最著則伊洛閩粵江西之學豈復有盛于吾浙中者哉虞集有云汝南周氏繼顏子之絕學傳之程伯淳氏而正叔氏又深有取于曾子之學以成已而教人而張子厚氏又多得于孟子者也顏曾之學均出于夫子豈有異哉因其資之所及而

用力有不同焉者耳然則所謂道統者其可妄議哉此
可以為二家傳授之定論也呂東萊以闕洛為宗變化
氣質其所講畫將以開物成務陳傅良于古人經制治
法討論精博陳亮才氣高邁心存經濟王禕以為考亭
朱子集諸儒之大成而廣漢張子東萊呂子皆同心勦
力以開先聖之道而當其時江西有易簡之學永嘉有
經制之學永康有事功之學雖其為說不能有同而要
皆不詭于道者豈不皆可謂聖賢之學矣乎此與朱子

並時而起皆有得于道者也至于項安世黃震方逢時
史伯璿之徒無慮數十人皆發明朱子之道者也至于
以文章名世如黃潛吳師道吳萊柳貫皆為一代之儒
宗而貫與師道皆學于許文懿公而文獻公巖然獨任
斯文之重見諸論著一本乎六藝以羽翼聖道謂文辭
必原于學術揆之聖賢之道無媿也宋景濂實出文獻
公之門遂為本朝文字之宗而國初設禮賢館景濂與
麗水葉琛龍泉章溢浙右儒者皆在焉國朝崇尚理學

實于是始則今日論先正之有功于斯道者豈可分道
學文藝為二科哉抑士之相與為斯學者非苟為名也
欲以明道也故天下貴之道苟明施之于世特舉而措
之耳宋之君子不能大有為于世蓋天命不欲興三代
之治而世莫能究其用也而景濂獨謂諸儒後先相繼
推明闡抉疏闊扶持理無不章事無不格雖聖賢復生
于後世無以加矣卒未有能繇其說而大有為于天下
以為其有志者鮮也夫豈盡然耶愚生特于浙中道學

之傳敢因明問及之而道統之傳尚未之悉也伏惟進教焉

問禹之跡遠矣尚書獨載九州所至蓋已周四海之外而昔人乃云禹治水益主記異物海外山表無遠不至以所聞見作山海經非禹行遠不能造也及學者言禹事多奇怪史稱禹蓋會諸侯江南計功會稽及杜元凱注左傳以塗山在壽春會稽與塗山豈二事歟會稽固今浙江之境也至少康

封其庶子于此以奉禹祀號為於越由此越世世
為君王矣果真禹之遺烈耶入其地有覩河洛而
興思者諸士子皆越產必知其國之故請言之

昔之聖人開闢宇宙以濟生人萬世之下皆仰賴其功
德而思慕之况禹治水造地平天成萬世永賴之功而
含氣之屬雖在四海之外猶知慕之况當時曾羣后之
地子孫封守之國有不知誦述之者乎夫人之景慕有
同地而知思之者矣有百里之外而思之者矣有數千

里之外而思之者矣是其人之德之相去之遠也雖然
以其人足為數千里之外思之而又同地則其思之何
如也昔唐人都河東殷人都河內周人都河南三河天
下之中帝王之跡多在焉後世之人考尋其故紀載其
事惟恐失之太史公西至崆峒北過涿鹿東漸于海南
浮江淮至長老皆各稱堯舜之處風教固殊焉又南登
廬山觀禹跡九江遂至于會稽上姑蘇望五湖東窺洛
汭大邳逆河行淮泗濟漯洛渠西瞻蜀之岷山及離碓

北自龍門至于朔方壯哉子長之遊其所感慨有餘思
矣宜其為書能馳騁古今上下數千載成一家之言也
夫唐虞堯舜之處今去之數千載而天下之人皆能識
之以其功德之盛利天下于無窮也則夫遊觀聖人之
地者雖數千載宜不能無感也自黃帝以來帝王莫不
有都軒轅之都涿鹿顓頊之都帝丘高辛之都偃師帝
堯之都平陽帝舜之都蒲坂禹興于西羌湯起于亳周
之王也以豐鎬而黃帝披山通道未嘗寧居東自岱宗

北逐獯鬻西至崆峒南登熊湘往往無常處及尚書載
舜五載一巡狩至周猶因之則三代天子其遊常徧于
五嶽矣蒼梧九疑之間紀舜之跡尤著歷世久遠而前
古聖人之跡具在而帝王世紀皇覽之書其述備矣禹
受治水之命披九山通九澤決九河定九州行跡所至
蓋周四海之外而世之論者乃以為山海經皆禹之所
親至而紀述之以為東至轉木日出九津青羗之野攢
樹之所據天之山鳥谷青山之鄉窮髮帶方之國南至

交趾孫漢續橘之域丹粟沸水之際南族黃支之堵不
死之望西過三危之阨巫山之下飲露之民奇肱之國
北至大正之谷夏海之窮祝栗之界禺彊之里積水積
石之山此皆荒誕不可稽考張騫之窮河源班勇之記
西域不能覩也大抵上古久遠故作者不經之論多託
之而學者言禹事尤奇怪羽淵之龍紀其父石紐之生
本其初台桑之合著其配觀河伯而受括地見六子而
獲玉璽得黑書于臨朐覩綠字于濁水桐栢有鬼神之

書宛委出五符之要秦數著陽行之跡應龍有尾畫之
詭其荒唐不根甚矣而屈子猶勤其問郭璞直信其真
不知洪範錫禹九疇禹乃取其陰陽之數自一至九之
序耳豈實有神人爲之手授乎惟會稽之會雖不載于
書而經傳猶有所據蓋禹會諸侯江南計功非五載巡
狩之常典也傳稱禹望九山之南宛宛中者則意在此
久矣故爲是非常之會也而禹之事終于此故百姓哀
慕之至今而左傳會于塗山執玉帛者萬國杜預以爲

塗山在壽春北酈道元以禹會諸侯防風氏後至禹殺
之王肅家語塗山有會稽之名則杜預之說非矣而羅
泌路史乃謂致羣臣于鍾山晉灼言會稽茅山故越絕
春秋言禹登茅山朝羣臣乃更名會稽今會稽有禹村
墟也又云禹抔水至大越上茅山今會稽在越中而防
風氏之國在今武康則會稽亦非茅山矣禹之會羣臣
非今之所謂會稽乎然云至大越而上茅山豈今之會
稽即古之名茅山而非建康之茅山也吳錄云本名茅

山一名覆釜蓋禹改之為今名也括地志云石箐山一名玉筍又名宛委山即會稽一峯也在今會稽縣之東而太史公言上會稽探禹穴所謂禹穴即在會稽山中而近世解者乃曠絕數千里而取巴蜀之禹穴亦誤矣禹既終于會稽故會稽之人思之是以少康封其庶子于此以奉守禹之祀號為於越此越之有國所以始也然傳至十數而中間國絕民復奉而君之是為甌越東越故越北界有禦兒鄉萬歲歷之說其事亦頗怪蓋越

人之慕思禹而欲得其子孫之為君如此其後勾踐為
王而與吳戰夫椒之敗保棲會稽得范蠡大夫種為之
臣乘夫差之驕黃池之會以兵襲其國都卒復棲吳王
于姑蘇之山故春秋於越入吳當是時越小國幾霸天
下越垂絕而復興者亦以越人之慕思禹而欲其子孫
之不亡如此其後王子搜患為君而逃乎丹穴越國無
君求王子搜不得從之丹穴王子搜不肯出越人薰之
以艾乘以王與王子搜之丹穴即禹穴也方吳越之戰

迎之檣李敗之姑蘇敗之夫椒棲之甬東檣李即嘉興之醉李城也夫椒即太湖椒山也甬東即句章之東海中洲也後數世王無疆為楚所滅盡取故吳地至浙江越以此散諸族子爭立或為王或為君濱于南海上蓋越人之慕思禹雖敗散而猶戴之為王為君也南海今台州之南海也無疆之長子後去瑯琊其次子蹄守歐餘之陽猶受楚封焉無諸保泉山漢立為閩越王其季餘善與孫搖又以海東隅地稱王號三越其地猶在今會

稽之域則雖至漢世而越人之慕思禹而猶戴之為君也
太史公序越事蓋反覆嘆禹之功大矣滌九川定九州
至于今諸夏又安乃苗裔勾踐苦身焦思終滅強國北
觀兵中國而推稱禹之遺烈其論東越列傳則謂越雖
蠻夷其先豈嘗有大功于民哉何其久也歷數代常為
君王勾踐一戰稱伯至餘善滅國而其苗裔繇王居股
等猶尚封為萬戶侯由此知越世世為公侯矣而又嘆
禹之餘烈蓋越之世祀視三代之後最為久長實以神

禹治水之功在萬世子長之論不可誣也愚生生長越中覽臨安之勝觀錢塘之江潮思宋建炎百五十年都會之盛每慨然太息况思禹之績有吾其為魚之嘆乎承明問敢述所聞要之其所懷者遠矣非誇胥臣之多聞子產之博物也謹對

河南策問對二道

問古之君子因時會竭忠謹建竝論卓然有稱於世紀諸史傳多矣今不暇槩舉姑取其最著者與

諸士子論之或舉世共稱而不無疵議或一時救
弊而未為通方或言可經常而足以行之後代或
意義深遠可為世主法誠者夫通達國體矣而其
學出于申商潛心大業矣而其術流于災異經明
少雙者被阿諛之譏然其言可廢歟博物洽聞者
泥五行之傳然亦有可采歟語當世理亂是非錯之
徒不能過其果然歟志在獻替其所論辨通見政
體可備述歟至于竭誠奉國而理歸切要擬之政

論為孰是論諫本仁義而炳若丹青平生力學所得而為世龜鑑方之申鑒孰優夫學者稱道古昔所以規摹當世也數子之書繁矣抑可以擷取一二足以為警誡而備世務者庶幾于魏相條陳晁董之對蘇軾進讀陸贄之言用以觀經世之學

論天下之士非才不足以達當世之務非識不足以周事物之情非誠不足以攄獻納之忠務不達則其幾莫能中也情不周則其致莫能極也忠不攄則矯激以沽

名懷隱而多避徇私而少公怯懦而不盡其言莫能信也甚矣人臣之于君子其得言之時亦莫不有言而嘗失之是三者猖狂叫號以自試于萬乘之前而不自度且以售其欺冒之姦故井竈不可語于海者拘于虛也夏蟲不可語于冰者篤于時也曲士不可語于道者束于教也持寸莛以撞萬鈞之鐘必不振矣世之說者曰諫之道天下之難為欲以觀其所易而閑其所難然後上下恬然而雍睦又以為臣能諫而必能使君之納諫

而後為能諫之臣此與韓非之說而憂其不合者何以異是皆懼撻人主之逆鱗而天下無忠義之言矣要之君子遭時遘會立人之朝其才足以達是其識足以周是其忍不為明主言之故知而不言言而不盡者非所以立人之朝者也是所謂謂吾君之不能為堯舜者也執事發策舉前代之論諫者以為問夫一世之君則一世之臣不知其幾也當時陳說者蓋多矣而史之所載彰彰者僅是以史之所載累而積之蓋多矣而執事所

舉者又僅是雖然言而中其幾極其致而忠誠足以感
移人主垂法後世者又少也如執事之所舉皆其人也
夫謂舉世共稱不無疵議者豈不以賈誼通達國體而
出于申商董仲舒潛心大業而流于災異匡衡被阿諛
之譏劉向泥五行之傳乎漢高祖時同姓寡少尊王子
弟大啓九國諸侯王僭擬逾制匈奴數盜邊賈誼陳治
安之策皆當世切務而或謂其明申商之學者獨以論
諸侯王宜用權勢法制耳然衆建諸侯實事之當然也

與晁錯削七國異矣本三代之所以長久謂天下之命懸于太子太子之善在于蚤諭教與選左右教得而左右正太子正矣或謂誼與晁錯皆明申韓而錯則以人主之所以尊顯功名揚于後世者以知術數也而以術數教太子若保傅之篇使後世知三代教太子法者誼啓之也豈可與錯同論乎漢初制度疏濶誼欲改正朔易服色正官名興禮樂謂湯武置天下于仁義禮樂而德澤洽秦置天下于法令刑罰而德澤無一有移風易

俗使天下回心而鄉道類非俗吏之所能為夫刀筆筐
篋之間非徒漢事然也雖後至今數千年如此矣劉向
稱誼言三代與秦治亂之意其論甚美通達國體雖古
伊管未能遠過可不謂然乎武帝舉賢良文學之士仲
舒以賢良對策皆傳經義本天道曰王者欲有所為宜
求其端于天故聖人法天以立道天地之性人為貴知
自貴于物又曰勉強學問則聞見博而知益明勉強行
道則德日起而大有功尊其所聞則高明矣行其所知

則光大矣此孔氏之遺言七十子之後莫能述也論聖王之禮樂教化欲令當世人主改絃而更張之與賈生之旨不異而仲舒之淵源深矣自漢興以來天子與其大臣皆好尚黃老至孝武始興文學罷黜百家表章六經實自仲舒發之故諸不在六藝之科孔子之術者皆絕其道勿使並進至於今學者守之雖然自恣苟簡之治百世未能變也道同六藝用世操術則異者又未必軌于聖人也班固稱仲舒遭漢承秦滅學之後六經離

析下帷發憤潛心大業令後學者有所統一為羣儒首
其不謂然乎漢儒傳經皆有家法而匡衡明經說詩當
世少雙所以其論奏粹然儒者之言曰朝廷者天下之
楨幹也公卿大夫相與循禮恭讓則民不爭好仁樂施
則下不暴上義高節則民興行寬仁和惠則衆相愛曰
治性之道必審已之所有餘而強其所不足聰明疏通
者戒於太察寡聞少見者戒于壅蔽勇猛剛強者戒於
太暴仁愛溫良者戒于無斷湛靜安舒者戒于後時廣

心浩大者戒于遺忘曰妃匹之際生民之始萬化之原
婚姻之禮正然後品物遂而天命全曰審六藝之旨則
天人之理可得聖王之自為動靜周旋奉天承親臨朝
羣臣動有節文以章人倫夫端本養性審藝治內正儀
皆人主之大法也衡能為此言而史譏其持祿保位被
阿諛之旨與孔光等同譏以為恭顯用事不能犯顏直
諫則然也然傳先王語其醞藉亦足稱賢矣劉向博聞
通達古今作洪範論發明大傳著天人之應七畧剖判

藝文綜百家之緒三統歷譜考步日月五星之度與孟軻荀況司馬遷董仲舒揚雄並稱而譏切王氏尤發于至誠蓋自恭顯之世其忠懇已見于封事矣曰衆賢和于朝則萬物和于野覽歷世之治亂必以和氣致祥乖氣致異因論當世人主開三代之業招文學之士優游寬容使得並進章交公車人滿北軍朝臣舛午繆戾乖刺文書紛糾毀譽混亂熒惑耳目感移心意不可勝載是時恭顯用事善類蒙修永光之詔亦自謂邪說空進

事亡成功公卿大夫好惡不同孝元固已自知之卒以
優游不斷墮宣帝之業可為來世之永鑑矣向之學在
洪範傳推迹行事比類相從緣箕子之意著天人之應
世儒亦未可妄論也夫謂一時救弊未為通方者豈不
以崔寔語當世理亂而有政論之作也漢之儒者言教
化自賈誼董仲舒匡衡劉向皆極論之而王吉亦謂俗
吏所以牧民者非有禮義科指可世世行也以意穿鑿
各取一切而質樸日衰恩愛寢薄東京以後尤競察察

鍾離意宋均魯恭第五倫之徒常以為言而杜林亦譏
後世不能以德而勤於法吹毛求疵詆欺無限桃李之
饋集以成罪家無全行國無廉夫而仁義之風替矣崔
寔獨著論謂漢承百王之敝數世以來政多恩貸馭委
其轡皇路傾險欲峻法以求治以此為亂世之藥石仲
長統稱其書以為人主宜寫一通置之座右特亦以其
達權救弊為一時之所急耳若以此施于官威縱橫之
日是固其宜也寔之政論夫豈通方之論耶夫謂言可

經常可以行之後代者豈不以荀悅志在獻替而有申
鑒之作也當建安之時政移曹氏天子拱手而悅自以
時無所用作申鑒五篇其所論辨通見政體謂致政之
術先屏四惡乃崇五政而以偽亂俗私壞法放越軌奢
敗制為四惡興農桑以養其性審好惡以正其俗宣文
教以章其化立武備以秉其威明賞罰以統其法為五
政悅之論非所以施于漢末顧自以抱王畧而不得志
為奏以發之要其所施設皆平世法也可謂言簡而事

該矣攷其正俗之論謂君子之所以動天地應神明正萬物而成王化者必乎貞定而已在上者審定好醜善惡要乎功罪毀譽效於準聽言責事舉文察實無惑詐偽以蕩衆志故事無不覈物無不效善無不顯惡無不章百姓上下覩利害之存乎已也肅恭其心慎修其行而民志平矣漢氏所以凌遲恣戚宦之權成鈞黨之禍夫豈不由於此即匡衡言四方楨幹劉向譏朝廷舛午皆此意也悅之申鑒豈非經常之法耶晉初士大夫

祖述何晏老莊之論朝廷皆以浮誕為美武帝創業法
度廢弛劉頌竭誠奉公每有論奏該覈政體謂法禁寬
縱積之有素未可一旦以直繩下然至于矯世救敝自
宜漸就清肅如行舟雖不橫截迅流然當漸靡而往稍
向所趨然後得濟也其救時矯世非急迫之論異于徒
事一切敢于斷割者矣又謂聖王之化執要于已委務
于下居事始以別能否因成敗以分功罪而羣下無所
逃其誅賞尚書統領大綱歲終校簿賞罰黜陟之今權

不歸于上事功不建不知所責也細過繆妄人情之所
必有而悉糾以法則朝無立人矣為監司者類大綱不
振而微過必舉謹密網以羅微罪奏劾相接狀似盡公
而撓法實在其中也故聖王不善辟密之按而責凶猾
之奏頌之斯言實末世通患所以然者彼持天下之衡
而未能公天下之大觀以為如此足以塞區區之責也
亦類俗吏之所為耳由此言之頌欲矯弊而不必任嚴
切之法所以為賢于寔者也擬之政論則頌為是矣唐

德宗時陸贄上言諫諍之道有九弊以好勝人恥聞過

騁辨給銜聰明厲威嚴恣彊愎為君上之弊以諂諛顧
望畏懦為臣下之弊論朝廷之乏人其患有七不澄源
而防末流不考實而務博訪求精太過嫉惡太甚程試
乖方取舍違理循故事而不擇可否而覈才馭吏之三
術則拔擢以旌其異能貶黜以糾其失職序進以謹其
守常其欲人主悔禍新化要在捨己從衆違欲遵道遠
儉倭而親忠直推至誠而去逆詐杜讒沮之路廣諫諍

之門掃求利之法務息人之術其道易知而易行在約之于心焉耳唐史稱其論諫數十百篇譏陳時病皆本仁義可為後世法炳如丹青蘇軾以為進苦口之藥石鍼害身之膏肓如贅之言開卷了然聚古人之精英為治亂之龜鑑者也雖房杜姚宋克致清平考其道德仁義之旨蓋過之矣其論興亡之際謂天所視聽皆因于人天降災祥皆考于德非人事之外別有天命也而時之否泰事之損益萬化所繫必因人情情有通塞故否泰

生情有厚薄故損益生聖王之居人上也必以其心從天下之欲不以天下之人從其欲乃至兢兢業業一日二日萬幾幾者事之微也信哉孔子讀易至于損益喟然嘆曰損益其王者之道歟贊于天命人情之際可謂論之剴切者矣宋嘉祐間司馬光上言人君之大德有三仁明武以興教化修政治養百姓利萬物為人君之仁知道誼識安危別賢愚辨是非為人君之明唯道所在斷之不疑姦不能惑佞不能移為人君之武其論御

臣之道有三曰任官信賞必罰謂國家采名不采實誅
文不誅意故天下飾名以求功巧文以逃罪欲博選在
位之臣各當其任有功則增秩而勿徙其官無功則降
黜而更求能者有罪則流竄刑誅而勿加寬貸又以祖
宗開業之艱難國家致治之光美難得而易失作保業
隆平之基因而安之者易為功從而救之者難為力作
惜時無遠慮必有近憂作遠謀燎原之火生于熒熒作
謹微華而不實無益于治作務實合而言之謂之五規

光自謂獲事三朝皆以此六言獻平生所學盡在是矣又謂五規皆守邦之要道當世之切務也宋之仁宗可謂漢唐以來之令主矣當此時韓琦為宰相君臣皆賢迄不能如光所言豈以其分量有所止雖四十年深仁厚澤無以進于三代之隆為可惜也蓋嘗讀其保業之規言天下得之至艱守之尤至艱自周以來離而合合而復離五代生民之類不盡者幾希太祖始建太平之基上下一千七百餘年天下一統五百餘年而已承祖宗

艱難之業奄有四海傳祚萬世可不重哉人主撫全盛之運知易離難合之天下土崩瓦解之勢常伏于至全至安之中誠不可一日而不兢兢業業者也唐自失河北以天下之力終不能取燕雲十六州没于契丹宋南北遂至抗衡迄不能自支折而入于北若奄有唐宋所不能有之土其不為尤重也哉所謂尺地莫非其有一民莫非其人也其所以愛吾人保吾土誠不可一念自放者矣夫陸贄司馬光其言固皆可以為萬世之所取

法而申鑒之言亦不能易也文有博有約固不得以優劣論矣執事欲取數子之書為可垂警誡而備世務者愚于前所陳蓋亦得其畧矣昔者嘗誦而論之雖其言散見于史傳而天人性命之理出焉詩書禮樂之道存焉治性正身之則著焉端本善俗之幾昭焉朝廷之所以順治百官之所以得職王化之所以隆國是之所以定天命去留人心向背皆繫于此也夫謂意義深遠可為法誡則劉向山陵之奏與陸贄司馬光論天命保業

此其尤諄切者也至于財賦兵農夷狄之大務諸疏皆有之以明問之所未及亦未暇盡述也夫此數子者固皆一代之偉人其論議著于本朝載于後世視小儒齷齪暖姝勉強綴論而中無所有者真秋蟲之鳴也夫大人之言遠小人之言隘正人之言直邪人之言慝仁人之言恕賊人之言刻智人之言明昧人之言窒米鹽博辨非當施于人主之前也銖稱寸度非可以規天下之大也蓼莪成行瓶甌有堤量粟而舂數米而炊非治萬

乘之國也如此之類常形于奏牘則人主之聽覽眊矣
故梁麗可以衝城而不可以窒穴言殊器也騏驥騅騮
一日千里捕鼠不如狸狌言殊伎也鴟休夜撮蚤察毫
末畫出瞋目而不見丘山言殊性也故非有天下之才
與天下之識而忠足以犯人主者其言必不文而其行
必不遠噫安得起諸君子而與之言天下之事哉愚生
狂愚亦頗有感于今世之務顧不敢以言未及而言之
然竊有慕於魏相蘇軾之條陳進讀不勝忠愛之惓惓

也

問今河南置省大梁包鄭衛梁楚潁川南陽之地
前代人才之盛難以盡舉姑取當時任事為豫冀
之產者各舉其槩與諸士子論之俱逢角逐之秋
矣或運籌帷幄辭萬戶之封或崇明王畧拒九錫
之議其心跡何似並遇威豎之難矣或依違順旨
定左袒之功或守正嫉邪嬰滅頂之禍其道誼孰
得負蒼生之望均也一以致山桑之衄一以致淮

淝之捷其名實孰當際中興之運同也一以成述
作之能一以成應變之務其功名孰優屬時多難
或負高志而不能免陳濤斜之敗或有膽畧而不
能拒封丘門之入其才畧孰勝遭世治平識量英
偉定社稷之策臨時果斷有大臣之風其德業孰
隆諸士子尚論古人凡此者固所宜究心況其鄉
之先哲乎其悉述以對

任天下之事貴乎善應天下之變而非其才德之全不

足以當之才德純備是以能受之至大而不驚納之至繁而不亂以輔世成治能使天下不傾而自居其身于安全之地其在我者則然而使其所遭之數有不然者是固君子之所不能必也書曰若有一个臣斷斷兮無他技此德之有以兼乎才者也徒德而已則椎魯樸鄙之徒也不可以語才書又曰不敢替厥義德率惟謀從容德此才之本乎德者也徒才而已則輕儇疾捷之徒也不可以語德夫欲以任天下之事出于是二者皆不

足以有成世因以為才德不足以集天下之事而又求夫小才涼德用之何怪乎天下事日以廢壞而不振也昔成周作洛宅于土中謂天地之所合也四時之所交也風雨之所會也陰陽之所和也詩曰高高維嶽峻極于天維嶽降神生甫及申人才之盛固有以哉如伊尹太公申伯仲山甫卓然為王者之佐而管仲子產百里奚孫叔敖皆有聞于世孔孟蓋論之矣今特因明問畧舉漢以來遭時遇主經綸世故史傳所記者謹掇拾以

對張子房當秦楚之際以家世相韓為韓報仇擇可以
委身者遂從高帝漢之天下已定矣子房不受萬戶之
封願從赤松子遊或謂子房不終事漢者為韓也夫誅
秦滅項子房之志已畢移以事漢何損于義而必去之
獨其為道恬澹薄視人世之功名而有飄然遠舉之志
耳荀文若遭漢室之亂間關河冀以從曹氏奉迎鑒駕
徙都于許魏之大業垂成矣文若不從九錫之議畢命
壽春或謂文若之死非為漢也夫士之死亦非容易使

其甘為曹氏佐命何以輕于殺身獨其為才所役度天下無可以盡其用者而自托非所昧明哲之智耳蓋世之于子房也病于予之過其于文若也病于絕之深善乎史氏之言曰智算有所研踈原始未必要終取其歸正而已亦殺身成仁之義也其論當矣陳丞相傾側擾攘楚魏之間卒歸高祖常出奇計以救紛糾之難迨諸呂擅王無能有所匡正而阿意順旨呂氏之權由此以起然後將相合謀因間而發遂定宗廟蓋其從高祖在

兵間不憚為詐卒以此成功可謂應變合權矣夫所貴
于成天下之事使皆若王陵之言未必能逆折其勢不
過謝疾杜門而已其後將何以有為哉陳仲舉處桓靈
之時有清世之志樹立風聲抗論偃俗為天下正人所
依歸而宦豎操弄國權濁亂海內仲舉與聞喜合謀誅
廢以清朝廷天下雄俊莫不延頸企踵以思奮其智力
而謀之不逮致太后有雲臺之遷凶豎得志士大夫皆
喪其氣而邦國殄瘁矣徒能死天下之事而智不足稱

也夫戶牖功成而不免于譎仲舉身殞而不失于正善
乎史氏之言曰以仁為己任功雖不終然其信義足以
維持民心漢世亂而不亡百餘年數公之力也其論卓
矣殷深源識度清遠為風流談論所宗屏居不就徵辟
而時人擬之管葛以其出處卜江左興亡及其入東國
釣乘季龍之殂歿實闕河蕩平之機也而出領中軍師
次山桑曾無禦敵之策蹙國喪師華夏鼎沸豈非名之
浮于實者乎謝安石高臥東山本無處世之意而諸人

每恨其不出為蒼生憂及見登用鎮以和靜禦以長算
苻氏率衆百萬次于淮淝京師震恐夷然無懼色指授
將帥大致克捷勁寇土崩中州席卷江左奠安豈非實
之能副其名者乎雖然深源之清徽雅量固自為衆議
所歸而桓溫尤忌之溫亦謂人曰浩有德有言向使作
令僕足以儀刑百揆朝廷用違其才耳斯言不誣矣或
以安石比王導則誠然而以深源並王衍不無少貶也
張燕公于玄宗最為有德及太平用事納忠惓惓所與

祕謀密計甚衆朝廷大述作多出其手善用人之長引天下知名士以佐佑王化粉澤典章成一王法天子尊尚儒術開置學士修太宗之政皆公有以倡之開元文物彬彬公之力居多故天下稱其文姚元之尤長吏道決事無淹思三為宰相常兼兵部屯戍斥堠士馬儲械無不諳記帝方躬萬機朝夕詢逮他宰相畏威謙憚惟獨元之佐裁決以得專任承權威干政之後紀綱大壞而能先有司罷冗職修制度擇百官各當其才故天下

稱其通雖然元之雖善應變以成天下之務然天資權
譎計出張說于相州罷魏知古為尚書而東都壞廟之
對幾于佞矣故燕許並稱其文章真為無媿而姚宋齊
名君子不容無優劣也房琯自成都奉冊靈武亟見任
用以天下為已任知無不為叅決機務諸將相莫敢望
既而以賀蘭之譖分軍討賊師敗于咸陽唐世名儒皆
稱其有王佐之才然將兵固非所長一與賊遇遂至喪
師前史稱其遭時承平從容帷幄不失為名宰而用違

所長遂陷浮虛比周之罪桑維翰事晉當草創之初藩鎮多不服維翰勸其主推誠棄怨以撫之訓卒繕兵務農通商以安中國羽檄從橫從容指畫神色自若當時齊王捨維翰之謀信景延廣之狂策遂被俘虜抑維翰屈意北朝所謂毛羽未成不可以高飛蓋其勢不得不然耳又嘗讀唐史稱瑄之廢朝臣多言瑄謀包文武可復用雖瑄亦謂當柄任為天子立功其喪師亦以監軍之促戰非其罪也惜夫一跌而遂不復振人比之王衍

陸機謬矣桑維翰兩秉朝政出楊光遠景延廣于外一
制指揮節度使十五人無敢違者使居平世都將相其
勛業豈小哉嗚呼士之不幸遭逢阨會身名俱殞者則
房桑二子是也宋自仁宗之世天下號稱治平韓富二
公與范希文歐陽永叔一時並用世謂之韓范富歐魏
公嘉祐治平間再決大策以安社稷當朝廷多故處危
疑之際知無不為而與范歐同心輔政百官奉法循理
朝廷稱治富鄭公為相守典故行故事傳以公議無心

于其間而百官稱職天下無事史臣稱魏公相三朝立
二帝垂紳正笏不動聲氣措天下于泰山之安可謂社
稷之臣矣又稱國家當隆盛之時其大臣必有耆艾之
福推其有餘足芘當世富公再盟契丹能使南北之民
數十年不見兵革與文潞公皆享高壽于承平之秋至
和以來共定大計功成退去朝野倚重由此言之二公
之功名蓋相當矣嗚呼士之幸而遭際太平福德俱全
者則韓富二公是也抑中州之人才此特因執事所問

及者言之若賈生之通達蔡邕之文學張衡之精思卓
茂之循良李膺之高節黃憲之雅度鄧禹之功勲有不
可一二數者孔子嘗在衛則衛多君子光武起南陽則
南陽多功臣至如程氏兩夫子傳千載不傳之道統而
許文正公自得伊洛之學有開世太平之功皆今河南
境內之產也詩曰高山仰止景行行止願因程氏以求
觀聖人之道而志伊尹之所志也謹對

震川別集卷二下

欽定四庫全書舊要卷一萬七千一百十六

集部

震川別集卷三

明 歸有光 撰

制誥 奏疏 策問

先任太子太保禮部尚書文淵閣大學士張治賜
謚文毅誥文

制曰朕於國家之事凡臣下有所建白苟有可采咸賜
施行實以付之公議而不私焉故太子太保禮部尚書

文淵閣大學士張治孕靈湘漢際會風雲權掄魁於鴻
漸之辰獲利見於龍飛之歲遂官翰苑事我先皇帝三
十餘年往殿南都以長六卿尋被召還置之丞弼忠誠
直亮庶幾有為而弗永其年然隆恩厚卹君臣之義可
謂有終始矣間於媚嫉之臣易名未當頃有言者朕下
之禮官攷論其世以爾詞尚理要制作渾雄心存世務
議論慷慨考文章以知人如陸贄之識韓愈因公正而
發憤若汲黯之斥張湯引以同升悉為今日之宰輔與

之異趣實乃當時之大姦是以朝廷服其節槩天下想其風采昔我先正良用懷思不有嘉名曷稱輿論是用謚爾文毅蓋公議久而後定非樂於有所改亦必歸於是而後已也爾其不昧尚克享此

諭祭贈資政大夫南京禮部尚書裴爵并配贈夫人楊氏封太夫人郤氏文

維爾性含淳質家承素風有子為文學之臣進位膺秩宗之命贈封薦被伉儷偕榮考其積系之原寔由善德

之致再稽令式憫卹宜厚於厥終爰軫疏聞寵數特申
於併錫賁茲新竈祭以共牢尚其冥靈歆此嘉饗

諭祭提督福建等處軍務都察院右僉都御史塗

澤民文

惟爾蚤占科名歷躋通顯屢經任使積效賢勞自頃粵
寇稽誅蔓延三省生民受毒徵發連年為我中國之憂
貽朕南顧之慮爾當間寄畏此簡書協謀進兵共成猗
角鯨鯢就殄嶺海漸清方茲念功遽聞奄逝豈以山川

之險遂犯霧露之危朕用惻然遣官諭祭靈其如在尚克歆承

諭祭山西巡撫都察院右副都御史毛鵬文

惟爾初由俊造薦服仕官遺惠愛于稠鄉肅紀法于栢府超陞太僕尋陟中丞屬猥狁之匪茹廼朔方之攸寄斬首捕鹵捷音屢聞繕塞保城勞績可紀方申移間之命亟上養疴之章未究厥施奄惟大疾殫塲多故朕用拊髀人才寔難予所哀念特遣諭祭以慰幽魂爾若有

知其克歆此

諭祭原任南京兵部右侍郎劉畿文

惟爾世族名家接武科第清塗華轍薦歷寺臺昔從內
庭曾董紫宮之役晚撫全浙永寧滄海之波顯有譽聞
方深委寄蘭橈桂棟最勞績于考工鶴列魚書上內獲
于幕府恩貤嗣子位正陪卿在告養病奄忽長逝用錫
祭葬以厚厥終靈其有知尚克歆服

封朝鮮國王妃朴氏誥文

制曰我祖宗誕膺天命統御萬方懋惟東藩恪修方貢
奕世休饗恩賚有加朕嗣守丕基率遵先典迺國君繼
祚既遣使以疏封肆婦爵從夫復並隆其命數爾朝鮮
國王李昫妻朴氏出自元宗夙開方訓爰膺妙選作配
名邦方嗣位免喪之時協令居燕譽之吉適暨平表良
副佇懷特封爾為朝鮮國王妃於戲宜爾室家繫一國
之風化共承祭祀衍百代之雲仍無墮令儀以迓多福
欽哉

進香疏

某官某等謹奏為大喪禮事仰惟大行皇帝宮車遠
奄棄萬方四海之內含氣之屬靡不哀慕如臣等荷
恩深重其於悲慙尤倍恒情謹備降香一炷具本專左
某官齋進謹以奏聞

奉慰疏

奏為奉慰事某年月日接到大行皇帝遺品以某年月
日龍馭上賓普天同慕攀號靡及仰惟皇帝陛下聖孝

天性方當諒闇之時哀慕至切臣等不勝悲愴無以為情伏念大行皇帝受天明命纘紹丕圖覆露羣生四十五年享國長久近古罕比又以聖人為之子顧命之日為天下得人朝不改署市不易肆海內晏然大行皇帝在天之靈殆無遺憾矣天下神器帝王大統陛下膺茲付託之重伏乞仰遵遺詔節哀忍性愛精育神以繫華夏蠻貊之望為天地神人之主綿國家億萬年無疆之厯所以答揚光訓永世克孝實在於此臣等瞻戀闕廷

不勝大願

乞改調疏

為乞恩改調以圖報効事臣於嘉靖四十四年會試中式蒙先皇帝收錄賜臣同進士出身除授浙江湖州府長興縣知縣自以平生受國家養育之恩亦欲少竭涓埃以圖報稱於萬一念百里之寄實非容易臣謹守教條悉意撫循妄謂今天下生民元氣耗矣宜專務休養之不當厲蠶銳事刻覈以取目前之快也然泥古而不

通於時務信心而不達乎人情功效蔑聞罪過山積幸荷
聖明不加罪譴曲賜保全於隆慶二年六月十八日陞
臣順德府通判終以駑蹇不任驅策黽勉在官虛糜廩
祿審已量力甘自退廢又自念髫髻勵志白首不衰方
國家收錄人才之日臣不忍自棄於造化生成之外茲因
入賀萬壽聖節得望闕廷君父在上臣子敢不控訴愚
悃伏望勅下吏部改臣國子監一官俾臣以五經訓誨
學者匡隅雖貧讀書不廢於宦學桓榮已老專門自許

於師傅付臣之力足以任之俾於未死之年少盡平生之志亦以見聖世之無棄才也臣無任懇悃屏營之至
乞致仕疏

奏為乞恩致仕事臣於嘉靖四十五年蒙恩賜同進士出身除授某官隆慶二年四月內朝覲回任今蒙陞授某官領到吏部文憑一道即離任至原籍某府某縣不意疾火忽作調治未痊見今病勢侵尋不能前邁伏乞聖恩容臣休致念臣髫髻勵志白首不衰僅獲第於九科叨食

祿者二載涓埃未竭覆載難酬及其未死之年敢忘圖報之志成漢二史作唐一經或能發揮盛德傳示來世

策問

問兩浙天下重藩涵濡至治生民樂業蓋二百年於茲矣獨以承平日久吏治利弛釁孽或萌殆不能不為民病焉以田賦言之豪右之兼併里甲之攤稅其間欺隱飛詭姦宄四出今欲求經界之正丈量之法果當舉歟以差役言之官司之征派應辦之頻仍其間夤緣規避

弊累百端今欲行均平之政雇募之法果當因歟自倭
夷入寇民間徵調日廣邇者雖稱裁減猶未銷兵以蠲
外加之賦茲欲議兵食之省而練土著之民可乎自礦
徒為梗州郡繹騷尤甚邇者稍已怙息旋復糾衆尚隱
內訌之憂茲欲杜攘奪之源而嚴封山之令可乎夫丈
量似矣而增稅猶恐槩及下田不知何以合夫遂人辨
野之規雇募似矣而輸直猶恐累及貧戶不知何以得
於司徒保息之道土兵似矣變或不測事當豫防既濟

衣衾之戒其可思乎築塞似矣利之所在人不畏死
人厲禁之守其可復乎此四者均為民病誠宜蚤慮而
亟圖之也善救者譬如良醫之療病病已去而人不知
否則投之或誤未免重困所以救之者非也是知變革
之道必斟酌劑量識化裁之宜而後可以與此士於窮
居天下之務當無不究心者矧是為鄉土之患諸士子
必能悉其利弊毋徒諉之不知也

問我太祖高皇帝自始初建國庶事草創即命世子以

師事宋濂又選國子生國琦王璞等侍太子讀書禁中
其後大本堂之建制度文物盛矣而對詹同等議東宮
官欲用勲德老成之士于時羣臣當其選者可得而言
歟至於皇太子侍圓丘侍文華殿侍文樓無時而不致
其訓戒太祖之留意國本如此列聖御極其所以設教
置屬果能盡得聖祖之意否聖天子慈愛隆至近日廷
臣出閣之請尚以皇太子年齡未許夫明堂保傅之篇
莫不在於蚤諭教與選左右所謂少成若天性尤今日

之所當急也即舉出閣之儀而今之東宮官屬與講讀儀注果足以為盡諭教之法歟昔賈生少年常為文帝陳之此亦爾諸生今日之所當知者言之毋讓

問國家有非常之災天之所以警戒人主使修德以保大業而受多福也今天子承統祚寬仁恭儉天下延頸以望至治邇來災異頻仍豈上天垂象示所以仁愛之至者歟今歲洪水泛濫瀾漫數千里而大江以南海水震蕩沿海居民漂溺者以百萬計於洪範五行推其

事類以為貌之不肅故曰貌傷則致秋陰而常雨然至
於江河橫流海水飛溢其變不止常雨之應而已漢世如
董仲舒郎顗之徒皆能推陰陽以納說時君學者或以
為流於術數假經托義非吾儒之正道然前世因天變
下詔求賢良方正直言極諫之士今天下之事可言以
告吾君者多矣諸士子抱憂世之志其各以意對

問昔者孔子與其門人論學其後七十子之徒以此友
教諸侯而漢興六藝皆有名家以師法相授受更千百

年而學者不廢也至宋周子出而河南二程子從之受業同時有張子與二程並稱以為上接孔氏不傳之緒至朱子又獨得程氏之正傳則漢以來諸儒學者固置之不足道也然如程門高第弟子謝楊呂游之徒皆親有得於其師者而朱子往往病其悖於師說至其同時如陸子靜其所造已極於高明而鵲湖論辨終不能有合今之論學者所以倍格不相入為此也夫道一而已矣千古之心不異也何獨為聖人之學者直有此紛

紛也願聞諸儒之失與朱子之所以獨得者

問北邊為天下患吾所以備禦之者常屈於力之不足
二百年強盛之天下卒未有以得其勝算能幸其不來
而已然此乃上古之所不臣者猶可言也若閩廣在吾
疆域之中其聲名文物與齊魯不異非秦漢之時比也
而數年以來叛命者踵起雖告捷屢至而出沒如故非
復如先朝斷藤峽八寨之類可以旋就撲滅今幾為吾
腹心之疾矣議者謂不患於無兵而患於無財不患於

無財而患於無將又謂慎選牧守則能招諭解散雖不必選將可也其果然歟宋儂智高反嶺南得狄武襄而後平定漢李固薦祝良張喬為刺史太守則不發兵而交趾九真自寧前代得人之效如此今廟朝疇咨廷臣論薦自以為極當世之選而智勇之將循良之吏毋乃猶伏而不出歟抑得人如先朝之韓襄毅王新建者於今日果可必其成功否乎其有以告我

問揚子雲太玄惟弟子侯芭能知之雖劉子駿班孟堅

蓋莫能測也然桓譚以為勝老子張衡以擬五經至范
望之徒皆以揚子雲為聖人抑豈無見而云然耶則吳
楚階王之譏吾未知其果然否也至司馬溫公又謂玄
之書要以贊易非別為書以與易抗衡也然則今之學
者皆知讀易而不能信玄則其所謂學易者亦毋乃無
所得耶夫侯芭者諸士子之鄉人也故以太玄與諸士
子論之

問我太祖高皇帝再造區宇創業之初經綸萬務若不

遑給而紛紛著作上追典謨以遺聖子神孫者龍圖延
英之所度不啻富矣姑舉一二為諸士子言之嘗以祭
祀為國大事念慮之間儆戒或怠無以昭神明命禮官
及儒臣編存心錄又將饗太廟致齋武英殿命東閣大
學士吳沉等輯精誠錄曰存心曰精誠聖祖所以嚴事
上帝神明者至矣其大旨與其條目可舉而言歟夫以
我太祖之於祭祀如此其於深宮之居褻近之御肯少
肆耶蓋即其對越神明之心也自古帝王著作多矣以

儒者之學接堯舜禹湯文武之統此所以亘千古而莫
及也二書實今日經筵勸講之所宜先者諸士子莊誦
久矣宜敬陳之

問邇者洪水為沴四方奏報日聞詔命所在賑貸德意
至厚也夫先王九年之積今日不可冀矣周禮大司徒
以荒政十有二聚萬民亦有可酌而行之歟管子書云
湯七年旱禹五年水湯以莊山之金鑄幣贖人之無糧
賣子者禹以歷山之金鑄幣以救人之困夫聖人居至

高之位乃能軫念人之無糧賣子者則當時之民其必不至於死也呂成公有言天下古今不同古人可行之法皆已施用今但舉而措之耳試舉前代之救荒宜於今者有幾其若堯湯之世能念人之無糧賣子者否昔哀公問於有若曰年饑用不足有若告以盍徹乎夫饑而用不足而告之以徹尤今世之所謂迂者也然散利薄征實荒政之首務徒散利而不薄征又不若不散之愈矣今議賑貸未嘗不行而曰免民田租則動以國計

為言然則必使百姓受其實惠以不負我聖天子哀愍元元之意如何而可

問程子答張子定性之書以為動亦定靜亦定無將迎無內外其論至矣然易傳解艮之辭謂止於所不見而外物不接內欲不萌則猶若張子之恐其累於外也中庸喜怒哀樂未發之謂中程子以為才思即是已發不知戒慎恐懼亦已涉於思否呂氏求之於喜怒哀樂未發之時楊氏未發之時以心驗之則中之義自見皆若

有悖於程子之言至於李愿中學於羅仲素而知天下
之大本有在於是者是即得之楊氏者也則呂楊之說
亦未易可訾矣抑程子所謂內外兩忘與外順虛緣出
怒不怒之言何以辨艮卦之傳與息緣反照徇耳目內
通而外於心知者何以殊才思即已發與可使如槁木
死灰者何以異夫學者於佛老皆知闕之矣至吾儒心
性之學常不免與之相涉者凡此皆諸君平日所當體
驗而析之於毫釐者願聞其說

問劉向稱賈誼通達國體古之伊管未能遠過又稱董仲舒有王佐之才雖伊呂無以加孝文一代之賢主其始未嘗不深知誼而卒為東陽絳灌之徒所排棄誼長沙武帝始三策仲舒乃以為江都相後亦見嫉於公孫弘再相膠東竟廢於家昔人稱賢才之用舍繫國家之治亂誼雖不用無損於文帝之治武帝以汲長孺之廷爭而上所傾向乃在於弘湯使仲舒列於九卿其亦何所救乎即二子得君如伊呂其果可以追三代之治乎

抑班固言誼之所陳孝文畧見施行仲舒居家朝廷有大議使使者就問之及武帝推明孔氏罷黜百家立學校官舉茂才孝廉皆仲舒發之則二子於當時蓋未為不遇也而誼乃至自傷比於屈子之沉沙而後世尤以仲舒不用為武帝惜何也

問孔子贊易自庖羲氏刪書自帝堯此以前未之及也雖好奇如司馬子長亦斷自黃帝以為史記然圖緯所載世猶傳之秦皇九皇之稱或亦見於史記管子謂古

封泰山七十二家春秋緯有十紀之名其亦可信歟或謂古有渾沌氏蓋天地之始生如屈子天問淮南子所稱多僞僂然皆無有及於此者至如晞韋冉相容成之號又何所徵歟孔子稱易有太極是生兩儀又論十三卦制器尚象之始則上古有天地其漸有帝王固理之必然者而左史倚相能讀三墳五典八索九丘之書當孔子時前古之書猶有存者何孔子皆棄而不錄歟宋司馬溫公為資治通鑑而道原劉氏與溫公深相契合

然通鑑不敢續獲麟劉氏作外紀乃始於盤古氏何也以諸君於書院中方讀外紀試相與論之

問周官之法五家為比十家為聯五人為伍十人為聯四閭為族八閭為聯使之相保相受刑罰慶賞相及相共以受邦職以役國事周公之所以經紀天下者詳矣國初斟酌前代之制定為里甲實本於此今天下編戶不具黃籍無稽流冗與土著雜處見丁著役牌面沿門輪遞之法比郡罕有行之所以姦宄竊發四夷交侵

夫豈不由於此也夫周官自鄉大夫至於閭胥無非教民以孝弟睦婣敬敏任卹漢置三老猶有此意我太祖高皇帝手諭教民榜文固在今欲遵行令鄉老教民決訟議者以為不可行何也夫不遵奉典憲而徒取壹切以務聲名豈國家所以任屬長吏之意茲欲求化民成俗之效何道而可諸士子為我言之

問周官宗以族得民昔之聖人其治天下而篤于敦本故其民維繫而不可解夫氏族之始宗法之立其可詳

歟宗法廢而譜牒重歷代為譜學者可數歟魏起北方胡為而獨重高門唐尚文雅胡為而更崇氏族袁誼柳玘豈非世家之賢者乎今譜牒亡矣宗法豈可得而復乎與諸士子論道而及此毋以為迂也

問兵之所圖畫者地形也古有九塞猶在中國之間若夫北紀以天街為界內外之大防莫嚴於此矣秦漢取河南地因河為固議者不以為上策何歟魏晉之世諸種雜處江統郭欽嘗論之矣以魏武之英畧不知慮此

何耶魏之六鎮唐之三受降城源懷之所論張仁愿之所營果周秦之故塞歟石晉以十六州賂契丹中國失勢以宋太祖太宗之烈不能爭尺寸終宋之世武功不競卒貽青城之禍抑其故何也我國家廓清僭亂一統之勢尊矣然朔方故郡統萬舊城彼得以居之在廷碩畫之臣時有論建而未能復也諸士子籌之於今日必有勝算

問兵衆之所聚必有行列司馬法軍旅什伍之數具矣

管夷吾作內政所以輕於變古者何也世言陣法蓋本
黃帝握奇而公孫弘范蠡樂毅之說果得其意歟諸葛
孔明演之為八陣圖後世惟晉馬隆隋韓擒虎甚明其
說李靖傳之造六花陣以變九軍之法李筌配四正四
奇之位于八卦而裴緒新令有九陣圖其說可得而詳
歟孫子曰紛紛紜紜鬪亂而不可亂渾渾沌沌形圓而
不可敗兵之至妙非陣莫能也而筌又以為兵者如水
水因地以制形兵因敵而制勝能與敵變化而取勝者

謂之神則筌雖為圖而其說乃又出於圖之外固知兵者之所不可不究也願有聞焉

問古語云有必勝之將無必勝之兵將者三軍之司命也人主求天下之士而尤難於得將才而兵法言論將之道有所謂五才十過八徵其求之可謂詳矣又曰將者智信仁勇嚴也又曰將之所慎者曰理曰備曰果曰戒曰約其責之可謂全矣然昔君臣之相遇風雲感會定分於俄頃如湯之聘伊尹於莘野文王之載尚父於

渭濱其果詳而求之歟齊桓登管仲於車中秦穆用百里奚於牛口其果備而責之歟古之人相遇如此之盛也今天下嘗病將才之難然恐有之而不能得也孔明不遇先主終老於南陽而已桓溫顧王猛而別求所謂三秦豪傑者豈豪傑之伏而不出其坐此歟抑雖終日與之居而莫識其人也請質之諸士子以觀其所以自待者

問自戰國力政而言兵者始籍籍矣其書大抵不出權

謀形勢陰陽伎巧四種而已而後世又有所謂三門者何歟夫兵者不過以智鬪智智饒者勝以力角力力雄者強宜無事乎至高之論也今其書乃類言大道者如所謂微乎微乎至於無形神乎神乎至於無聲又曰精誠在乎神明戰權在乎道之所極又曰神明之德正靜其極誠如其說則古之為將者必聖人而可也其果然乎又謂度量數稱則兵之法何又本於六律也至如荀卿子之議兵呂覽之言簡選淮南之叙兵畧諸士子亦

能通其說歟古之語大道者五變而形名可舉九變而賞罰可言則兵者在於禮樂刑政為至粗者也今能達於此說則知兵之非至粗也願聞其旨

問兵者天下之至變其安危存亡常在反掌之間緊計之得失明矣請以前史論之咸安君之禦漢師也果用李左車之言則淮陰將遂困井陘乎吳王濞之向關中也果行田祿伯桓將軍之計則條侯遂委關東乎董卓專漢命梁衍獻規於皇甫義真若從之其能就格天之

業否也夏侯惇鎮長安魏延進計於諸葛孔明若用之其能成搗魏之勲否也淝水之捷苻秦奔潰謝安石何以不知乘之渭橋之勝關中幾復宋武帝何以不知取之澶淵之幸議者謂寇忠愍拘小信而不亟徵擊否則能使隻輪不返歟朱仙之捷議者謂岳武穆守小忠而不能矯詔否則能使中原廓清歟諸士子來應武科一劔之任主司者不以此相期也當必有獨明將帥之大畧者姑舉一二以相試焉

問古今言兵者莫過孫子其書於兵之情變無所不盡
後之用兵者猶至方不能加矩至圓不能加規矣嘗試
舉其類如司馬懿不取小利而斬文懿此能而示之不
能也班超詭言散衆而降龜茲此用而示之不用也韓
信陳船欲渡臨晉而伏兵從夏陽襲安邑遠而示之近
也岑彭西擊山都而潛兵渡沔以敗張楊近而示之遠
也耿弇攻西安而拔臨淄善攻者敵不知其所守也鄧
艾據洮城而困姜維善守者敵不知其所攻也徐晃飛

矢而下韓範拔人之城而非攻也陶侃函紙而擒溫邵
屈人之兵而非戰也若此之類豈習其法而一一規合
之歟抑其書足以待無窮之變而自不能出其範圍也
夫果人之巧妙自與之合則孫子之書亦可無用歟驃
騎將軍言顧方畧何如不至學古兵法其然乎試為我
言之

問孔子之在當時人皆知其為聖魯三桓蓋僭竊之尤
者而孟僖子臨歿使其子師事孔子季桓子病輦而視

魯城歎曰昔此國幾興矣以吾得罪孔子故不興也嘗
讀其言而悲之然晏子西號為春秋賢大夫當是時
齊楚之君欲裂地以封孔子而子西沮之不遺餘力何
也子西猶知以孔子為聖人特自安于僭陋耳若晏子
肆為詆譏何其無忌憚也其後司馬氏父子稱良史猶
祖述其餘論以為儒者不可用至于後世往往陽尊孔
子而實陰用老聃申韓之術以治天下晏子之論何其
流禍之遠也盖千載人心學術之辨在于此願與諸子

論之

問昔稱吳興山水清遠士大夫皆慕遊其地其民風土俗之淳載于圖志者可考矣今時若與古異者將世變之不可挽歟抑治之教之者不至也漢內史之辦租賦渤海之化盜賊京兆之治告訐此其彰彰著聞者豈今時獨不可能歟其方畧化道見于班史可得而聞歟夫為吏者固不敢鄙夷其民也將求所以移風易俗之方何道而可諸士子為我言之

問我太祖高皇帝初定金陵姑蘇實為強敵自得江陰
長興而蹙吳之勢成矣耿元帥實建取邑之功遂留鎮
其地血戰者十年使上無東顧之憂卒殲巨寇以集大
勲其經畧備禦之策可得言歟洪武十七年上親定功
臣次第功高望重者八人長興侯次居第六及功臣廟
六王之下又有十五人而長興侯不與何也已卯真定
之援其死生大節世亦莫得而詳焉諸士子為其邑人
宜知其故其為我言之

問先儒有言士之品有三有志于道德者有志于功名者有志于富貴者今天下之人大抵出于科目夫志于富貴者不足言矣先朝講明道學如吳康齋輔相三朝如楊文貞諸公多不盡出于科目今之所謂道德功業非科目無稱焉是果足以盡羅天下之才耶然如二公者求之科目蓋少也夫科目不足以盡天下之才則天下之才果何所在豈士之不得于此遂不能立德而著功名也亦有謂科目敗壞天下人才其果然歟諸士子

皆邑之俊彥今茲來試其所以自待者于士之三品何
居願聞其志

震川別集卷三



總校官庶吉士臣張能照

校對官編修臣周厚輅

謄錄監生臣沈東昇